

# दुलसी तपस्या



गिरिजा कौल



आदरणीय माता जी  
श्रीमती गोनवती  
यिम्न ब यि वचन सोम्बरन  
छस अरपन करान









# तुलसी तपस्या

(बखती शारु सोम्बरन)


गिरिजा कौल

# आर्य समाज

(संस्कृत भाषा में लिखा)

आर्य समाज





आदरणीय गुरु माता  
श्रीमती मोहनी जी (मम्मीजी)



ਸਾਹਿਬਜ਼ਾਦਾ  
(ਸਿੱਖ) ਦੇ ਪਿਤਾ ਜੀ



# तुलसी तपस्या

(बखती शारु सोम्बरन)

गिरिजा कौल

# तुलसी तपस्या

(A Collection of Devotional Poetry)

लेखिका	:	गिरिजा कौल
पिता सुंद नाव	:	स्वर्गीय विशनाथ जद्
मातायि हुंद नाव	:	श्रीमती गुनवती जद्
बर्था सुंद नाव	:	श्री मखन लाल कौल
माल्युन	:	अनन्तनाग
वॉरिव	:	व्यजुब्रोर कश्मीर
छापनुक वॅरी	:	2005
तेदाद	:	500
म्वल	:	100 रोपॅयि
डी.टी.पी.	:	रिंकू कौल (94191-36369)

किताब मेलनुक पताह :-

1. मकान नं. 336, गली नं. 11,  
तालाब तिलो, जम्मू। Ph. : 2502748
2. मकान नं. 170, स्यकटर—6, चिरन्जीव विहार,  
गाज़ियाबाद (U.P). Ph. : 91-120-2768909

© यि किताब आयि

छाप खानु प्यठु छापनु तु अमिक साँरी हकूक  
छि लेखिकायि निश महफूज़।



## अनुक्रमणिका

२६	श्रद्धा पोश	गिरिजा कौल	i
२७	अन्तर व्योद (भूमिका)	प्रो. भूषणलाल कौल	iii
1.	हा गण—टाठे		1
2.	हावतम असुलच वथ		4
3.	देह अभिमानी देह मंज नेर		6
4.	लल नचान न्यथुनन्य		8
5.	सोज़ शमा कृष्ण दुरदानय		10
6.	तनुहा यितम चु पानय		12
7.	लोसुवुन सिर्य छस दिम अनुवॉरी		15
8.	पानय पानस मु फर		17
9.	ध्यान धारना खारि व्यमानस		19
10.	रँग रँग गुल फवलान गुलज़ारन		21
11.	मनु ग्वफि अमृत वुज़ान दारि दारे		24
12.	कांह जाय रुज़म न खॉलिये		26
13.	वेथि हुँद आलव बूज मनसाये		28
14.	माता करुनाविथ दोरु दोर		30
15.	मूडु जीवस क्याज़ि शेरान थालस		32
16.	सूहम गंगुराय गन्य गनेय मॉजय		34
17.	सोवुम पॉपी पोहल अहँकार		37
18.	सूरदास सनि कति		39
19.	हारि चरि शाहदत		41
20.	परू—कर्मन छु फल		43
21.	शीव जी लगुयो शंकर नावस		45
22.	ख्वनि सेतार, ख्वनि दिलदार		47
23.	शीनुमाने अशिवाने		49

24.	आस्था छम दिलस चॉनिये	51
25.	सतगुरु गुरुदीवु दूता मे सोज़	53
26.	वनुन छु न आमस	55
27.	कुनि किन तारतम माता अपोर	57
28.	सीवायि यछ पछ सतुकुय पल	59
29.	गूपालु यितु राधा बलय	62
30.	सतगुरु वनतम गव क्या उपास	64
31.	सॉवनुस ज़न ज़िंदय, बु चेंताये	66
32.	गरु गरु फीरिथ अरु आस मॉजय	68
33.	शरण परण शीवस माजि शीवाये	70
34.	सरस्वती सनम्बख सवालस जवाब	72
35.	माजि कशीरे स्र्वगुच हूरे	74
36.	आरादुना, आरादुना	76
37.	ब्योन ब्योन नख्खि निगारी मकानन	78
38.	मरिथ मरुना	80
39.	हा श्व्वदायो छुय सवाला	82
40.	सतगुरु पूजा करय	84
41.	चिन्तन चु जीवु कर	85
42.	दूरफलि यितुमो	87
43.	साई रामु रामु रामु परुनावतम	89
44.	शीवु लगुयो बु चरणन	91
45.	शबुरे पजि प्रेयम रथि पान खोरुन	93
46.	रामाये नमः श्री शमाये नमः	95
47.	जायि जायि भक्तेन चु व्यस्तार मॉजय	97
48.	मनु म्याने चु अनु दाता	99
49.	मन्दर मस्जिद बुतखाना	101
50.	हम ब्रम मशुराव, येम छुय फेरन	104



## श्रद्धा पोश

‘गुरुदक्षणा’ पतु छस बु वोन्य ‘तुलसी तपस्या’ ह्यथ त्वहि ब्रोंह कनु आँमुच। यि वचन सोम्बरन छि म्यानि भक्ति भावुक प्रकट रुप। बु छस दयु लोलस मंजु लय स्पदिथ हनु हनु मनु खोचर गालनुचि सादनायि मंजु बठि यपारु प्यठु अपोर तरनुक संज करान। मै यि केंछा महसूस छु स्पदान या बास छुम यिवान तथ छस लफ़्ज़न हँन्द जामु वलिथ रॉछरनुच कूशिश करान।

बु छस खॉलिस गुरु कृपायि सुत्य अख अख कदम ब्रोंह पकान। मॉलिस तु माजि हंदिस आँशीरवादस सुत्य छुँ मै हश माजु हुंद लोल तु बाग्य आमुत। यि छि म्याँन ख्वशानसीबी। म्याँनु हश तुलसी द्येद छि अथु तुलिथ मै हर विजि आँही करान तु सादनायि हंज वथ गाशरावान। स्व छि मै ज़िन्दुगी जुवनुच ह्यमत ति दिवान तँ होसलु ति। यथ वचन सोम्बरनु छु तिहँदुसँई नावस प्यठ मै ‘तुलसी तपस्या’ नाव थोवमुत।

यि वचन सोम्बरन छस बु पनुनि माजि श्रीमती गोनुवती अरपन करान तिकयाज़ु तँम्यसुंद र्यन ह्यकन नु मै ज़ांह तु नखु वँसिथ।

बु छस श्री प्यारेलाल स्वेदशी साँबुन स्यठाह  
मशकूर यिमव स्वदिलु यिमि किताबु हुंद मोख चित्र  
तैयार कौर तु पनुनि होनरु सुत्य शूभराँवुख म्याँन  
अरजथ।

प्रोफेसर भूषणलाल कौल साँबन य्वसु रहनुमाँयि  
तु होसलुअफ़जाँयि मँ कँर बु छस वछि वॉलिंजि  
तिहुंद शुक्रिया अदा करान। तिमव ल्यूख येमि किताबु  
हुंद सरनामु तु वरुतु वरुतु दितिख पनुनि मोलुल  
मश्वरु।

म्याँन भर्ता श्री एम.एल कौल साँब छि हर  
विजि म्याँन होसलुअफ़जाँयि करान तु रँच काँम  
अंजाम वातुनावनस मंज न सिर्फ अथुरोट करान  
बल्कि जाँती दिलचस्पी निथ म्यान्यन ख्वाबन जामु  
पौरावान।

बु छस अख ईशर बँखुत। पनुनि साधनायि  
मंज, य्वसु म्यानि खाँतरु सारुवुयि खोतु ज़्यादु अहम  
छि, यि केंछा मे द्रीँठ छु यिवान बु छस तिमन लोलु  
पोशन मालु कँरिथ रँछरावनुच कूशिश करान।

10-01-2005

गिरिजा कौल



## अन्तर व्योद

जदीद काँशिरु बक्ति शॉयिरी मंज छे श्रीमती  
गिरिजा कौल पनुनु वोन्दु वुशनेरु सुत्य सॉनिस  
तुरुनेमुतिस वजूदस मंज जितनि वुहनाँविथ दुबारु  
जुवनुच कल गनिरावान। ईशर माय सॅनिरावान। लयि  
अनान तु लोलु बावुथ हिंजु गुंगुरायि सुत्य तलख  
जिन्दगी हुंद ट्यछर मेछरावान। गिरिजा जी छे गोडु  
बॅखुत तु पतु अख शायिरा। मुखतलिफ़ तजरुबाँती  
मरहलौ मॅन्ज सफरस नीरिथ म्वख्तु चॉर करान तु  
मानसरु बॅठु बॅठ राजु होँजुन मॉरमाँज तु प्रेयवुनि  
वुड़व डींशिथ तु ह्याँती हुंद जाम च्यथ रूहाँ  
तजरुबन वचन गंडस मंज आकार बखशान।

तमि छु गौरम्वख धारण कोरमुत तु न्यबरु प्यठु  
अन्दर अचिथ छि कोह तु बाल छंडान। वॅनु दिवान  
बालुयारस — हुपॉर, यपॉर, चोपॉर तु तसुंद अमार  
लोलि ललविथ गाहे पोशन मालु करान, गाहे मनु  
यन्दरस पन खारान, गाहे ग्रटनि चॅकरस मंज पनुनि  
हन हन पिशान तु गाहे फुलयि मचि हुंद पॉड्य  
पोशि—पथरि मंज चोपॉर वॅन्य दिवान।

गिरिजा जी हंज गोडनुच शारु सोम्बरन

‘गुरू दक्षणा’ गई सन् 2001 ई० मंज छाप तु वॉच असिताम। मै छु ज़न तु कालुक बतु याद येलि मै तमि बड़ि दोह अथ किताबु प्यठ पनुन मकालु पेश कोर येलि गुरू मातायु दॅस किताबु हंज रस्मु रोनुमॉयि जेमिस मंज स्पुज अंजाम। अज छि गिरिजा जी दोयिम शारु सोम्बरन बॅखत्यन अर्पण करान। किताबु छु नाव ‘तुलसी तपस्या’। अथ मंज छि पंचाह बक्ति—गीत।

गिरिजा जी छि वॉरिव गरस मंज दीवी स्वरूप हश मॉज तोल्सी द्यद यमि प्रथ विजि पनुनि श्रह्यल व्यवहारु सुत्य तस जिन्दगी जुवनुच तु साधनायि हंज वथ पानुनावनुच प्रेरथ दिच। तुलसी द्यद छि मुतबरक तुलसी हंदिस रुपस मंज रॅतिच अलामत बनिथ तिहुंद पोशि चमन शूबुरावान तु मुशकावान। तिहुंदसुय नावस प्यठ छु यथ शारु सोम्बरन ‘तुलसी तपस्या’ नाव दिनु आमुत। वुछुवय यि छु सोरुय तुलसी द्यद हिंजु तपस्यायी हुंदुय फल।

बक्ति गीतुचि कैह अहम खसूसियॅच छि यिथु पॉठ्यः—

- (1) यि छु गीत युस संगीतचु कहवचु खसिथ खोट या पासु आसनुक अहसास छु करनावान। दीतव अन्दरिमि तारि ज़ीर हृदयि किस सॅदरस वोथन मलख तु ज़ूनु लागि मान मान चूनि जरनस।



- (2) यि छु अध्यात्म लोलुकि वुशनेरु सुत्य कमन  
 कमन संगीन दिलन कठिशु लद शीनुमानि हुंद  
 पाँट्य जेठु तन्न सुत्य रौनु दामानन श्रोन्त्य श्रोन्त्य  
 करुनावान। शॉयिर छु पानु बखुत आसान। बु  
 वनु गोडु बखुत तु पतु शॉयिर। तलसाँ यादु—वैत्रिस  
 फिरिव वरक। परमानन्द, कृष्णजू राजदान, लक्ष्मण  
 बुलबुल, मास्टर जी, गोविन्द कौल, भवॉनी  
 भाग्यवान द्यद, प्राण नाथ भट्ट 'गरीब' तु पृथ्वी  
 नाथ कौल साँयिल छि सानि जेहनक्यन दारि  
 पटयन प्यठ वुफ दिथ बँहान। अहरुबलुच पान  
 चादरि हंज पोत ग्रज छि वनवन हुरि त्रावान तु  
 हृदय किस कोंसर नागस प्यठ छि लगान दिवै।
- (3) बक्ति गीतस मंज ह्यकि बँखत सुंद शोद बक्ति  
 बाव हावबावु वरॉय मुकम्मल समर्पण किस रुपस  
 मंज वखननु यिथ। अथ छि अंग्रीज ज़बॉन मंज  
 Total Surrender वनान। यानी मुकम्मल समर्पण।
- (4) यिति छु मुमकिन कि कुनि खास परम्परायि,  
 फिलासफी या वादस पाबन्द रूजिथ करि बँखत  
 ईशारस वन्दना तु वाबस्त असूलन वखनय।

गिरिजा जी हँन्द बक्ति बाँथ छि दरअसल  
 वचन बाँथ। 'वचुन' लफ़्ज़ छु संस्कृत ज़बॉन हंदि  
 'वचन' लफ़्ज़ प्यठु हना रुप बदलिथ वजूदस आमुत।

वचन ग्व वॉनी। मोखु मंज द्रामुच काँह मानी मतलब  
 दार कथ। शास्त्रण हंज काँह कथ या दोप। काँशरिस  
 मंज ग्व वचुन—वनुन, कुनि कथ बावथ करुन, ग्यवुन  
 तु वनुन। ग्व काँशरिस मंज छु वचनस संगीत  
 अहम। शारु सिनफि हंडिस रुपस मंज ग्व वचुन सु  
 बॉथ यथ 'वोज' छु आसान। वोज ग्व वचनुक सु  
 शार युस ग्यवान ग्यवान फीरु फीर वननु छु यिवान।  
 यु छु लीलायि स्यठाह नखु आसान। वचन बॉतुच  
 ज़बान अगर लुकु बूलु या लुकु ज़बान आसु यि छि  
 लूकु मँतिस ति मॉलु फिरवान तु लयि अनान।  
 गिरिजा जी नि यथ वचन सोम्बरनु मंज छि पंछाह  
 भक्ति लीलायि या वचन बॉथ। गणेश वन्दना, गुरु  
 वन्दना, ईशर पूज, दयि लोल, अद्वैत वादी व्यचार,  
 शिव वन्दना, शक्ति उपासना, सूहमसू तु अम्युक  
 तस्सवुर, आस्था तु विश्वास, श्री राम अस्तोथ, ध्यान  
 धारणा, कृष्ण प्रेम तु गूपियन हुंद लोल, राधायि हुंज  
 बेकरॉरी, काम, क्रूध, लूभ, मोह, मद तु अंहकार  
 हिव्यन शन शँथुरन मोख प्रथ, मनु गोफि मंज अमृत  
 वुजुन, ग्यानु सँदरु बँठ बँठ वोन्दु गाशरावनुच तमन्ना,  
 खोदायस आलव, अन्दुर अन्दरी कोह छंडिथ ध्यान  
 धारणायि दँस व्यमानस खसुन तु सोरुई रावरिथ  
 क्याताम प्रावुन, मानव सीवा, मॉजुकशीरु लोलुहँत



आलव, व्यस्थापन पीड़ा तु गरु गरु बानु फोथ ह्यथ  
फेरनुच मजबूरी वगैरु छि तिम अहम् मोजू यिमव स्व  
बावथ करनु खाँतिर लयि अँनु।

बँखुत छु हरविजु अन्दरयुम वुशनेर न्यबर छटान,  
यूगु छु अन्दुर अन्दरी चन्दरमु डीशिथ रूम रूम  
सगुवान तु वुठ सुवान। यूगिस तु बखतिस मंजु छु  
वारयाहन कथन मंजु ब्यन्यर आसान। बँखुत छु  
अशि दारि सुत्य डूरु सगवान। जानानस पान निछावर  
करान तु गुरु कृपायि दाँस ईशर वथ लबान तु गथ  
प्रावान मगर यूगु छु अँन्दुर अन्दरी कोह तु बाल  
छंड़िथ पनुनिस वजूदस साम ह्यवान तु काहन शँथुरन  
काचु अनिथ कैलास वातान तु राज हंस सँन्दिस  
रुपस मंजु मोखुत व्रुकान। बँखतिस छु पछ तु पछी  
छि तहँदि खाँतिर ईशर। यूगिस छु तीजु युस तस रुमु  
रूम पशपान छु।

गिरिजा जी छे मूलु तलु बँखत तु दयि लोलुच  
अमर्यत वुजुन छस लयि अनिथ आनन्द मगन  
करान। यिमव छु गोर मोख धरण कोरमुत तु गुरु  
मातायि हँदिस सायस तल छि फलि फलि मोखुत  
चाराण तु अशिवानु छलिथ तु विश्वास किस पनस  
ताँरिथ मालु करान तु रछरान।

बु करु यँत्यथ 'तुलसी तपस्यायि' मंजु दरज

केंछव बॅखत बातेंव मंजु केंह मिसालु पेश :—

- (1) पनुन पान पानय पुशरुन गाटस,  
सत संग सॅनिराव गुरु विराज माटस।  
टाटस कफ़न सुवुन पतजन लॉरी,  
शारिका ! लगय पॉर पॉरिये॥

(गीत संख्या 7)

- (2) बरु गॅयि तुलसी मंजु मागस,  
जाफुर चट्ट कति लूकु बागस।  
लागस बु मनु पोश मंजु बहारन,  
रंगु रंगु गुल फवलान गुल ज़ारन॥

(गीत संख्या 10)

- (3) लछिबॅद कैम्य क्रील पूज़ान लालस,  
मूडु जीवस क्याज़ि शेरान थालस।  
शारोंबिस शराबा, परि कति गीता,  
शुपनखि पूज़ान, ज़ानि कति सीता।  
हीथा हथियार, जवाबा सवालस,  
मूडु जीवस क्याज़ि शेरान थालस॥

(गीत संख्या 15)

- (4) 'सूरदास सनि कति चाँगिस तु गाशस,  
गाशदार तोलान ग्रामस तु माशस।  
मनु गाशे वुछान गरुडस तु बृषभस,  
सवारुय गणु गगरस, वदान मंजु मरगस।



पूथ्या पण्डितस, ज्यूत्या गाशस,  
सूरदास सनि कति चँगिस तु गाशस।’

(गीत संख्या 18)

- (5) ‘यार्यव तु सर्वव दर्शुन मे होवुम,  
सोवुम पॉपी पोहल अंहकार।  
निक बॅड छि यिकवटु मंजुला बनावान,  
पोरु पोरु दमु दमु जूला सजावान।  
पेश, यारि फ्युंगरा सु यारु उपहार,  
सोवुम पॉपी पोहल अंहकार।’

(गीत संख्या 17)

कॅह अहम वचन बॉथ यिमव बु स्यठाह मुताँसिर  
कोरुस तु यिमन मंज व्यचारुक गोब्यर तु सौंच  
फिकरुक सँन्यर नजरु छु गछान, छि यथ सोम्बरन  
जन तु पॅपिस कॅनकु डूरिस मंज हवाहस सुत्य कथु  
करवुनि गुलालुक हुसुन तु बजर, बख्शान। गुलालुच  
छि यहय खसूसियत कि आजाद तबीयत आसनु  
किन छु सु पोशि पथर्यन न्यबर मरगन, वुडरन तु  
डारन रौनक बखशान।

‘देह अभिमौनी देह मंजु नेर’, मन गोफि अमर्यत  
वुजान दारु दारे’, ‘सूहम गंगुराय गॅन गनेय मौजे’,  
‘सूरदास सनि कतु चँगिस तु गाशस’, ‘सोवुम पॉपी  
पोहल अंहकार’, ‘शबरे पजि प्रेमु रथि पान खोरुन’

तु 'ध्यान धाराण खारि व्यमानस' छि अमि लिहाजु  
 केह अहम वचन बाँथ यिम गिरिजा जी निस सोचु—  
 फिकरस सुत्य असि ज्ञान करुनावान छि। सौम्बरन  
 मंज छि केह बाँथ यिमेन मंज अलामती बावथ  
 (Symbolic expression) काँबिलि तवजुह छँ। वन्दना  
 तु आराधना छि पनुनि जाय। श्रद्धा तु लोल ति गव  
 पोजुयि। विश्वास छु अहम तु व्यचार छु बोधि हुंद  
 शृंगार। गिरिजा जी छि इशारव दँस क्याहताम वनिथ  
 दरअसल कथ ताम कुन इशारु करान। बासान छु  
 जदीद शायिरी तु अदब छु पसि मंजरस मंज बिहिथ  
 नवु आयि तस सोचनुच तु बावथ करनुच कल  
 कड़ान। यि छु अख नेक फाल।

गिरिजा जी नि भँखति शायिरी मंज छि पौराणिक  
 या Semi Historical नीम त्वोरीखी किरदार ति नवु  
 आयि व्यछनावनु आमत। कलु योगस मंज  
 त्रेता—योगिच शबरी लोल बरान तु पूज करान छि  
 दरअसल शाइरः येमि कथि हंज चेनुवन यछान दिन  
 कि बँखत छु लोलु होत हृदय ह्यथ ईष्ट दीवस छपि  
 लगान तु तथ अवस्थायि प्यठ वातान यँत्यथ जाँच  
 अथवा मजहबी पाबन्दी हुंद म्यचि दीवार छलु छलु  
 छि वाँस प्यवान। चोन तु म्योन, हु तु बु, बु तु सु,  
 बु तु चु — यिमु खई तु खन्दक छि पानय पुरवन



यिवान तु सोरुई छु सम बासान। यह्य गयि  
तुरयातीतावस्था।

‘गुरुदक्षणा’ वचन सोम्बरन प्यठ ‘तुलसी  
तपस्यायि’ ताम छु गिरिजा जी वारयाह सफ़र तय  
कोरमुत। यि छुनु ज़रूरी कि आँस सपुदव तिहंदिस  
प्रथ ख्यालस सृत्य मुतफिक। इखितलाफ़ योद सही  
पसुमंज़रस मंज़ पेश यियी करनु यि छु लेखन  
वॉलिस जेहनी तोर वुज़ुनावान तु ‘होश हा होश’  
कनव बोज़ुनावान।

शारु सोम्बरन परिथ वोतुस बु यथ नतीजस  
प्यठ कि गिरिजा जी छि अन्दरिमि वुशनेरु सृत्य लयि  
यिथ पनुनि विश्वासु मुताँबिक बावथ करान तु  
अध्यात्म साधान। साधना छि पॉन्य पानस मंज़ अक  
दुशवार वथ। रेयि आल्यन सिर मोठ छकनु सृत्य  
छुनु वोन्दुक गट ज़ोल ज़ोतान अथ छि ज़ान हंज़  
खालिस अख जँच दरकार य्वसु ज़ितनि ज़ूल  
वुज़ुनाँविथ नोन कृड़ि अद्भुत, वोन यियी नूर अनवार  
तु गोण वुज़ि ईशानुराग।

यथ वचन सोम्बुरनु मंज़ छि बँख्त बावुच  
छटवुन तेह। ग्यानु व्यचारुच ज़ोतवुन रेह तु कसताम  
राधायि हंडु हृदयुक नेह ज़न तु त्रिवेणी हंडु संगमुक  
एहसास करुनावान। यानी बक्ति, ज़ान तु प्रेम त्रशवय

छि शोकु वाल्यन सँदर सन्यर चेनुनुच दावत दिवान।  
 हूर वनुवुन छु कनन गछान यानी संगीत तु काव्य  
 दोशवय छि लरिलोर पकान।

मँ छु पूरु विश्वास कि 'तुलसी तपस्या' पौरिथ  
 करन ऑलिम तु मुहकिक पनुनि मोलुल राय पेश  
 यमु सृत्य शाइरायि हंज रहनुमाई स्पदि तु खसूसयँच  
 नेरन ननि तु खॉमीयन हंज स्पदु निशानदिही।

यमि किताबु हंज गोडुकथ लेखान छु मै पनुनि  
 मातृशक्ति हंदि पतुबजरुक अहसास स्पदान। यि छे  
 स्व शक्ति यमि हर विजि असि जिन्दगी जुवनु  
 खॉतिर कोठु दॉरुऑव, वथ गाशुऑव, फ़यकि फ़योक  
 बनिथ सथ बॉडऑव तु शखती बनिथ दिचुन शवस  
 जीर, चावँनोवुन ह्याँती हुंद जाम तु बनोवुन शिव।

8-11-2004

प्रोफ़ेसर भूषणलाल कौल  
 एम.ए, पी.एच.डी. डी.लिट्  
 (रिटायर्ड प्रोफ़ेसर तु  
 सदर, हिन्दी डिपार्टमेंट)  
 कश्मीर यूनिवर्सिटी  
 श्रीनगर — कश्मीर



## हा गणु टाठे

हा गणुटाठे, थदि दरबारु, छुख थजि त्राये।  
 छुख सेदिदाता, वर छु मोंगमुत, माजि व्वमाये॥  
 हा गणुटाठे, थदि दरबारु, छुख थजि त्राये॥

शक्ति चे लॉरिथ, मॉज ऑसिथ, दॉरिथ छि हलम,  
 मँगान भिक्षा, पूजि लागान, लालस छि अलम।  
 कलम चु पुशरान, ज्ञानु अमृत, वुजि बे—वाये,  
 हा गणुटाठे, थदि दरबारु, छुख थजि त्राये॥

वाहन छु मूशक, शक्तिमान शूबी, शेरस सवारे,  
 कारण—तारा, ओश वथरान, दीनन चु दारे।  
 मारे कुस कस, यस सुत्य सुत्य गणु—शीव द्राये,  
 हा गणुटाठे, थदि दरबारु, छुख थजि त्राये॥

ओं गणेशाये, पोर हा शीवन, त्योगुन बँगि रस,  
 द्वन कुनुय ज़ोनून, भय कोसुन, मनु राज़ु सुहस।  
 मस दिवान पोतरस, ख्वनि ललुवान सतग्वरु आये,  
 हा गणुटाठे, थदि दरबारु, छुख थजि त्राये॥

जपन तु तपन, यज्ञन्यन, स्यद छु नावा चोनुय,  
 छुख मूखिदाता, ज्ञानुदाता, जल यितु सोनुय।  
 कोनुय कलम म्योन, अथ डालुम, बँखतिस मे साये,  
 हा गणुटाठे, थदि दरबारु, छुख थजि त्राये॥

भूत प्रीत गालान, पालान जगि, पॉपियन संहार,  
 आहार द्रमनुक, म्यूठ भूजन, शीतल व्यवहार।  
 आदार जगतुक, कुन छु मन्त्र, ओं नमः शिवाये,  
 हा गणुटाठे, थदि दरबारु, छुख थजि त्राये॥

कूछुय ऑसिथ, प्रोवुथ मालि, आसन तु बजराह,  
 लँगोन ल्यँच्यन, मठु—मदारा तु स्यजरुच नजराह।  
 थजराह चे थदि थोद, थँज—डॉल्या लोला तु माये,  
 हा गणुटाठे, थदि दरबारु, छुख थजि त्राये॥

पूजुन गणेश जी, बँड बरकथ, अनस तु धनस,  
 मूर्ख अज्ञानी, खेयि कति अन, बरान कनस।  
 क्षनस दि प्रदिख्यन, माजि मॉलिस मसुलन छु पाये,  
 हा गणुटाठे, थदि दरबारु, छुख थजि त्राये॥



योद, मॉल्य पोतरन, जँग छु लोगमुत, जोरव शोरव,  
स्वर्ग लूकु दीवता, पोश सारान, बोरव बोरव।  
थथुरेयि शीवु गण, थथुरेमित्य, कूनन हा चाये,  
हा गणुटाठे, थदि दरबारु, छुख थजि त्राये॥

कार्तिक छु फेरान, पातालन, तीर्थन तु मन्दरन,  
वैरियिबोद परखान, शिव—शक्ति, गणु—कुमार गँदरन।  
स्वन्दरन स्वँदर कथ, रुच वथ लँब मूड कायाये,  
हा गणुटाठे, थदि दरबारु, छुख थजि त्राये॥

सरस्वती, लक्ष्मी, ठरि रूजिथ, लरि छेय शूबान,  
डंडवत प्रणामा, द्वनवय गणु ध्यानस छि डूबान।  
लूबान दिल, गिरि, अथु डालुम चु कर्म—लीखाये,  
हा गणुटाठे, थदि दरबारु, छुख थजि त्राये॥



## हावतम असलुच वथ

सदाशीवो, हा परमदीवो, हावतम मे असलुच वथ,  
गथ करान बौम्बरा, न्यथ न्यमान बॅखत्या, बावान मसलुच कथ।  
हावतम असलुच वथ॥०॥

समया क्रेठि—कूठ, मसला जेठि ज्युठ, ब्रमांडन दजान नार,  
जार अँन्य लूठा, सरयन गामन, अकनंदनन छु खुमार।  
शुमार कति करि, पापन शापन, ठगुनय प्रदिख्यन तु गथ,  
हावतम असलुच वथ॥

पानय मेहमान, पानय म्यजमान, पानय दास तय खास,  
अँन्यखलि बोंगरान, बानय बानय, लेच्यन अथुरोट तु अथुवास।  
पास कर दासस, खाम गोम पासस, बखशुम, चानी मे सथ।  
हावतम असलुच वथ॥

न्यथुनोन ननुवोर ब्रशबस सवारे, गरुबार थोद क्वह बाल,  
त्रशूला नोकदार, पोंपियन संहार, गुल्य—गँडान यम, ब्रह्मा, काल।  
साला लालस, शेरुहस थालस, ख्वनि ललुवन गछान मथ।  
हावतम असलुच वथ॥

शुबिहेस सासुक, वस्त्र नु खासुक, अलख निरँजन बोलान।  
व्योखतुय अंदाज, प्रजवुन्य आवाज, हटि वासुक छु शोलान॥  
जोलान चँटिथुय, ग्वफायन खँटिथुय मसतानु वुछि कति पथ।  
हावतम असलुच वथ॥



छौत रंग केशन, जाशुर नु डेशन, फेशन, लैजि वार्यन।  
 फुटमुत मकाना, थोक सु मसताना, जलरजौज बरन दार्यन॥  
 हार्यन चर्यन हुंद, च्यतस बोलबोशा, रंगु मंदोर्यन लथ।  
 हावतम असलुच वथ॥

डम डम डमरू, डोलक डाबुर, दीवगण गौमुत्य मस।  
 बम बम भूल्या, बाबा बोलान, चावान बैंगी रस॥  
 तस वनान बैंगिमोत सूरुमोत, सर्फुमोत, जटुनुय गंगा व्यथ।  
 हावतम असलुच वथ॥

संगसुय सोहबथ, पेयि क्याजि नोबथ, रुचुरुच करुहा मँग।  
 दारुन दामन, लट्यन तय लाँजन, अंद वाति जीवन जंग॥  
 अंग अंग मै व्यगलान, ज़न शीनुमौन्या, लेखान अफसानु खत।  
 हावतम असलुच वथ॥

मुचर बर, मँगुन मै वर, सरु कर चु पानय।  
 कन्यह तल रेयि आपु, न्युक—न्युक सु दानय॥  
 तानय बु बोज़ान, पुजाँर्या छु पूज़ान, भक्तिस वॉलिंज दथ।  
 हावतम मै असलुच वथ॥०॥

युथुय आस त्युथुय बु द्रास, वुछुम नु रामु वनुवास।  
 सफर चालु सीतायि, नॉल्य ज्यूग रँग सु खास॥  
 डॉल निम क्या बु तस, बेह्यस ख्यत तु च्यथ॥  
 हावतम मै असलुच वथ॥०॥

हंग रंग चोनुय, आदम बु प्रोनुय, 'गिरि' चाव चिलिमा तु म्वय।  
 नोव नोव व्यछुनाव, प्रोन प्रोन मॅशराव ज़ुलुनाव मनुची खय,  
 भय छु नु मरनुक, मरि मल गँद तु रथ॥  
 हावतम मै असलुच वथ॥०॥

## देह मंजु नेर

गुरु सुंद आदेश, कर मु हेर—फेर,  
 देह अभिमौनी, देह मंजु चु नेर।  
 आत्म प्रजुनाव, कर मु जीवु चेर॥  
 देह अभिमौनी, देह मंजु चु नेर॥०॥

सन्तोष ब्योल वुजी, लोल ग्रँजि पानय,  
 हुमख पान अँगनस, अमि येमि सानय।  
 दानय दानय समान, सु अख सेर॥  
 देह अभिमौनी, देह मंजु चु नेर॥०॥

सतसंग, मनु वारि, सग श्रूच खादय,  
 सन्यन ज़ख्मन दिवान, ग्वर म्योन दादय।  
 साधय सु साधना, रादस सु शेर॥  
 देह अभिमौनी, देह मंजु चु नेर॥०॥

ग्वरु नाव फोरि तस, होरि युस दयि र्यन,  
 ख्यनु ख्यनु सुमरन, सूहम रात द्यन।  
 ह्यन ह्यवान ह्यनहार, हैछान ज़बर ज़ेर॥  
 देह अभिमौनी, देह मंजु चु नेर॥०॥



काया छि कौतिल, आत्म छु स्वंदर,  
 कुरूपी चै ललवान, गण, कुमार, ग्वंदर।  
 अंदर शीव—मन्दर, न्यबर सूरु डेर॥  
 देह अभिमौनी, देह मंजु चु नेर॥०॥

स्व 'क्वबजा' सु आलव बोजान 'स्वंदरी',  
 आश्चर छु, वनि कुस मे, गाटुज ग्वंदरी।  
 अँन्दरी चै दयि नाव, स्वर्गन चु फेर॥  
 देह अभिमौनी, देह मंजु चु नेर॥०॥

दय आव खबरे, शबरे सु वनुवास,  
 बबरे पोशि टूर्य, पशमीन तु अँतलास।  
 खासि खास बूजन, मासि हुंद सु बेर॥  
 देह अभिमौनी, देह मंजु चु नेर॥०॥

हारि नो सोदा, बाजरस छि क्रख,  
 छेनि लेजि पाकुवान, दयि सुंज ग्रख।  
 खख करान, ख्वर डलान, ज़न हिलान हेर॥  
 देह अभिमौनी, देह मंजु चु नेर॥०॥

गिरजा चु सोरतय दयु सुंद नावा,  
 चूरि छयपि, टुकि, पिलुनावतय चु पावा।  
 ताह ताह छुय मंत्र, ताह दार ल्येर॥  
 देह अभिमौनी, देह मंजु चु नेर॥०॥

## लल नचान न्यथुनैन्य

गरि गाशदार अँन्य, डरि कति नंगु तन।  
लल नचान न्यथुनैन्य, करि क्या परदन॥

वुछुन गाशदारा, हुमुन सु पानु अँगनस,  
नारु मंजु गुलजार, माहरेन स्व लँगनस।  
स्वर्गु जामु पुरिथ, स्वनु सुंद सु वरदन॥  
लल नचान न्यथुनैन्य, करि क्या परदन॥०॥

लल छलान दूरि चूरि, निलुवठ तु दूरुय,  
बब वनान, हशि माजि, दोजख नु दूरुय।  
हूरुय स्व फाकुरि, कोसान, अबुदन॥  
लल नचान न्यथुनैन्य, करि क्या परदन॥०॥

जाँव्युल कँत्य कँत्य, अँछन अँशदारा,  
स्वामी, हशमाँज, छि क्रूठ, शाहमारा।  
आरन मंजु नचान, रोफ जुगान फरदन॥  
लल नचान न्यथुनैन्य, करि क्या परदन॥०॥



रातस श्वँगि कति, ज़ातस सनि कति,  
 सातस पशि कति, दातस मशि कति।  
 वति वाख लेखान, हश पशान रबदन॥  
 लल नचान न्यथुनँन्य, करि क्या परदन॥०॥

सपुद गरिय, काँशी, काबा, ज़ियारत,  
 लशि गशि लेखान, हशि हुंद हारत।  
 शारात नु, शम—दम, गाटुज छि ज़रदन॥  
 लल नचान न्यथुनँन्य, करि क्या परदन॥०॥

लूक़हान, दयिज़ान, ललि मँशिर पर तु पान,  
 शाँति मे आराम, स्वामी चु नादान।  
 हान छे नु शीवस, बखशुन छु मर्दन॥  
 लल नचान न्यथुनँन्य, करि क्या परदन॥०॥

जूग्य रंग, सतसंग, अंग छु अछिदार्यन,  
 कंग दज़ान, चंग वज़ान, शाकाहार्यन।  
 ल्यख थ्वख शेरे, दारन छि गर्दन॥  
 लल नचान न्यथुनँन्य, करि क्या परदन॥०॥

ललि गरि साल सब, बब छुनु आमुत,  
 यियि कति, खेयि क्याह, वुनि छुनु ज़ामुत।  
 चामुत चिलस ग्वफन 'गिरि' दग छि दरदन॥  
 लल नचान न्यथुनँन्य, करि क्या परदन॥०॥

## सोज़ शमा चु, कृष्ण दुरदानय

द्रोग सोदा वुछुम, मै वानु वानय,  
 सोज़ शमा चु कृष्ण दुरदानय।  
 ओन बु अनिगुटि, अथु डखुरानय॥  
 सोज़ शमा चु, कृष्ण दुरदानय॥०॥

खबु, ज्यूठ क्रूठ, खाम छुम कँबीला,  
 दार औतार, वन कुनुय सँबीला।  
 थव चु आबाद, बँसती तु खानय॥  
 सोज़ शमा चु, कृष्ण दुरदानय॥०॥

ब्बोछि—दादि, क्वछि मंज, श्रपान शमशान,  
 धनवान कति, ज़ानि अन तु अनदान।  
 छुम मै छेयि पश, मेचि हुंद मकानय॥  
 सोज़ शमा चु, कृष्ण दुरदानय॥०॥

द्वखलद दौद्यलद, भैक्षायि आमुच,  
 सुह ऑसिथ, शालु ग्वफि चामुच।  
 ज़ामुच, प्यामुच, छुम मै तानय॥  
 सोज़ शमा चु कृष्ण दुरदानय॥०॥



सचुने तुलान, सचसुय बु खोचान,  
 अडु हैछला बु जंदु जचि दोँछान।  
 पांछ वखतुच, न्यमाजा नु ज्ञानय॥  
 सोज शमा चु, कृष्ण दुरदानय॥०॥

लूकव कुत्य, लटि लाँज खॉरिम,  
 'गिरि' जिन्दु शव, शमशान सॉरिम।  
 पोज पँजाराव, पोज छुख पानय॥  
 सोज शमा चु कृष्ण दुरदानय॥०॥



## तनहा यितम चु पानय

तनहा यितम चु पानय, बानय बरुम चु वेयसिये।  
वनहा बु शार काँत्या, खनहा मनस बु व्यसिये॥

खॉली कलुश यि म्योनुय, गँगजल बरुस चु प्रोनुय,  
सुत्तय हेथ यि कर्मलोनुय, सतसंग करुन मै चोनुय।  
वागुर बोरुम न जाँह माँज, चाँगुर कोरुम मै व्यसिये॥  
तनहा यितम चु पानय, बानय बरुम चु वेयसिये॥

बोलमुत जिन्दय कफन छुम, कोरमुत रिंदय सिगाँरय,  
लशि हुंद पाँठय दजम तन, खशुमन गोमुत मारय।  
गेलान क्रंजन दयलन छिम, तेलान सँजन छि व्यसिये॥  
तनहा यितम चु पानय, बानय बरुम चु वेयसिये॥

कति चोन स्थान वनतम, खनतम दिलस मै नख्खा,  
बनतम चु वतुहावुक, वनतम छि कोस मै कक्षा।  
कुस अख यियम, दियम दाह, करि कुस मै बाह व्यसिये॥  
तनहा यितम चु पानय, बानय बरुम चु वेयसिये॥



जूगी दिलच बु रुगी, मरहम करुम चु योगी,  
 कति छुय अनुन सुनुन छुय, मूर्ख कँगाल बु भोगी।  
 खोचान बु छायि ग्रायन, सायन सवाल व्यसिये॥  
 तनहा यितम चु पानय, बानय बरुम चु वेयसिये॥

खेलि मंज खोलुस दयन बो, हयलुसय भयन वोलुस बो,  
 सीना दजिथ बु दीना, कीना रँटिथ मनस बो।  
 प्रॉरिथ बु मिसकीना, लॉरिथ मे केंह नु व्यसिये॥  
 तनहा यितम चु पानय, बानय बरुम चु वेयसिये॥

वादा चे सुत्य कोरुम मॉज, योतियोर अफू पोरुम मॉज,  
 सिर्यन यि शीनमान्य गॉज, तारख चन्द्र सुत्य बॉज।  
 लाव्यन वुठन स्व फिसुराय, पाव्यन डुवुम मे व्यसिये॥  
 तनहा यितम चु पानय, बानय बरुम चु वेयसिये॥

लंजि छुम चटान बुलबुल, यिनु चानिकुय छु सिलसिल,  
 पम्पोश बु अडफोला खिलु, साला चे सानि पजिदिल।  
 गँडमुच मुदय मे वतनय, मंडमुच वथा मे व्यसिये॥  
 तनहा यितम चु पानय, बानय बरुम चु व्यसिय॥

बोनुनम कडुन चै हाजथ, कर्मय अदय चै पूरिय,  
 करुकति नुकार माजे, पजि तल थोवुम न चूरी।  
 कथु यिम करेम अजताम, कथु तिम खुरयम मै व्यसिये॥  
 तनहा यितम चु पानय, बानय बरुम चु वेयसिये॥

हरदुक वुथर बु थथरान, रुमु रुमु सु गुमु वथुरान,  
 कँदमूल मैकुत सु कतुरान, डोरेन वुछुम सु सतुरान।  
 दकु द्युत मै अनुडेरन, सेरन फुरान बु व्यसिये॥  
 तनहा यितम चु पानय, बानय बरुम चु वेयसिये॥

यन्द्रे जुलान मै जख्मन, सेन्दरे बलान मै क्रौरी,  
 जुलनुय थवान छि जौरी, इकवट रँलिथ छि सौरी।  
 करि क्यासना कमिस कुस, यसदिख पनाह चु व्यसिये॥  
 तनहा यितम चु पानय, बानय बरुम चु वेयसिये॥

‘गिरजा’ गँमुच गोतन जन, कति आयि जीव व्यथु वन,  
 रठ दम, कथन चु मयसन, व्याख्या वचुन वतन खन।  
 सीना छु आवुर्योमुत, वीना बजान छि व्यसिये॥  
 तनहा यितम चु पानय, बानय बरुम चु वेयसिये॥





## लोसुवुन सिरिं छस, दिम अनुवॉरी

लोसुवुन सिरिं छस, दिम अनुवॉरी।

शारिका लगय, बु पॉर्य पॉरिये ॥

रहबर सत्ग्वरु, रुति सातु ज़ामुत,

आमुत पॉपियन, छु वतु हावुक।

बावक्य बु बावान, ब्यल चॉर्य चॉरी ॥

शारिका लगय, बु पॉर्य पॉरिये ॥० ॥

सातुक ज़ातुक छु सातय, बनावान,

पृछिथ ग्वरु दीवस, कर्म शोलुनावान।

केशनानवान पान, चॉरी तु फ़ॉरी ॥

शारिका लगय, बु पॉर्य पॉरिये ॥० ॥

छु आश्रम आसतान, पॉरिये पॉरिस्तान,

राज़िदिल सु दिलबर, दिलदार भगवान।

सगवान, सग दिवान, कुल्यन दॉर्य दॉरी ॥

शारिका लगय, बु पॉर्य पॉरिये ॥० ॥

बॅन्य बॅन्य कूत आम, वनु कस दास्तान,

हनि हनि सारान, तनि म्यानि यज़मान।

थॅजुवान, थजुकाद, थल चॉर्य चॉरी ॥

शारिका लगय, बु पॉर्य पॉरिये ॥० ॥

त्रेशि—हौत, ज़ंडन फटान मंडान रेगिस्तान,  
गिरिफ्तार ह्यौंद, सिख, कोशुर मुसलमान।  
गुलिस्तान, शमशान, अँदुर, बरन तौरी॥  
शारिका लगय, बु पौर्य पौरिये॥०॥

बुछुम सुह वाहन, चमुसान दोरान,  
ननुवोर खोरन, कौंड छुस नु पोरान।  
सोरान शरीरा, फेक्यन पापु बौरी॥  
शारिका लगय, बु पौर्य पौरिये॥०॥

पनुन पान पानय, पुशरुन गाटस,  
सतसंग सँनिराव, गुरु विराज माटस।  
टाटस कफन सुवुन, पतजन लौरी॥  
शारिका लगय, बु पौर्य पौरिये॥०॥

आबशारन, ज्वयन, रौछदर छु इसताद,  
पहरा च्वपौर्य, ज़ल बौगरान व्वसताद।  
पाद साधन छलान, दवान ननुवौरी॥  
शारिका लगय, बु पौर्य पौरिये॥०॥

‘गिर’ फिरान, चावान लालस, गलि—गलि,  
हँल्य—हँल्य पकान, अन आपरान फलि—फलि।  
चलि मा मथुरा, द्वद छु कौर्य कौरी॥  
शारिका लगय, बु पौर्य पौरिये॥०॥



## पानय पानस मु फर

मूड जीवु, सनतस, नेंद्या मो कर,  
 जॉहिल चु पानय, पानस मु फर।  
 छ्वपु द्वपु शाप छुनु, छुय हो वर॥  
 मूड जीवु, सनतस नेंद्या मो कर॥०॥

सन्तस नेंद्या सपुद, सिंगारा तु साज,  
 आसनस बिहिथ परान, वाजा न्यमाज।  
 नभ, क्वहन बालन, कुनुय, अख छप्पर॥  
 मूड जीवु, सनतस नेंद्या मो कर॥०॥

द्वखस स्वखस, सन्तस, गछान कुनुय गूल,  
 चिलिमा चवान, दूरी वुछान जूल।  
 मुशकव, मजव निशि सु, बे-खबर॥  
 मूड जीवु, सनतस नेंद्या मो कर॥०॥

सन्त निष्कॉमी, फलदार छु कुल,  
 जीवु कर प्रशादा, बन बुलबुल।  
 सनि सौन समन्दर, सु गंगाधर॥  
 मूड जीवु, सनतस नेंद्या मो कर॥०॥

नैद्या सन्तस छुय, ख्वरदैन्य ख्वराख,  
 नैद्या करन वॉलिस, वदुना तु बाख।  
 दुयत्भाव, चिकुचावु निशि छुय न्यबर॥  
 मूड जीवु, सनतस नैद्या मो कर॥०॥

शरीरी चे रोजुन, छुय व्यवहॉरी,  
 रूहॉनी खँठिथ, चँटिथ स्व दिलुदॉरी।  
 संध्या करान, केम्य—क्रील बैयि तीतर॥  
 मूड जीवु, सनतस नैद्या मो कर॥०॥

मूड, ज्ञानु—कांगुर, मो चु छयँवराव,  
 सूरु सृत्य, नूरु अथु, मो वुशनाव।  
 साधु, साधना सुशील, यमुसुय थर॥  
 मूड जीवु, सनतस नैद्या मो कर॥०॥

गाशदार सन्तन लगान, पॉर्य पॉरी,  
 'गिर' गरीब ग्वरु—दारुच, गँछुस यॉरी।  
 भूमि मे बँजर, अँदर सु अजगर॥  
 मूड जीवु, सनतस नैद्या मो कर॥०॥





## ध्यान धारना खारि व्यमानस

मूडु जीवु, रोजतो दमस ध्यानस,  
 ध्यान धारना, खारि व्यमानस।  
 वथ छार, कथ कर चु जानानस॥  
 ध्यान धारना, खारि व्यमानस॥०॥

तारख नभ, बरजस च्वापॉर्य, फोलमुत,  
 ज़न स्वर्गु जामु, नंगु तनि वोलमुत।  
 संध्या स्वन बनावान, खोटिस त्रामस॥  
 ध्यान धारना, खारि व्यमानस॥०॥

तारख मंडलव, मॉज ज़ूनु वॅजमुच,  
 ज़न संगरमाल, चूरि गरि चॅजमुच।  
 ज़ून शोलि, शूबिदार, दर चु मावस॥  
 ध्यान धारना, खारि व्यमानस॥०॥

संध्या, अपुज छु, अपज्यॉरिस मॅशरान,  
 रामायण तु, गीता छु पुशुरान।  
 जोंग लगान, ज़ालस तु ज़ोलानस॥  
 ध्यान धारना, खारि व्यमानस॥०॥

संध्या जीवु हज, हवन, रामु तीर्थ,  
 आलुछ अँजुराव कर चु गौरथ।  
 मय सु फिरि मस्तानु, पयमानस॥  
 ध्यान धारना, खारि व्यमानस॥०॥

संध्या चेनुवन, चिन्तन, चमत्कार,  
 मँरिथ मरुन, जीवस जीनिथ हार।  
 जिंदु मरि, बर खुलान, दयुवानस॥  
 ध्यान धारना, खारि व्यमानस॥०॥

संध्या छु लोनान, छूवचु, बेहद्राव, जँमीनस,  
 ववान, प्वखतु म्वखतु ब्योल, हर दीनस।  
 जाग्रण, व्रत, न्यमाज, रँछा जानस॥  
 ध्यान धारना, खारि व्यमानस॥०॥

महलु खानन वुछुम, छल, कपट, मल,  
 अचुन ग्वफन गारन, बसुन यारु—बल।  
 'गिर' चु वातुनावतन, अन्तिम स्थानस॥  
 ध्यान धारना, खारि व्यमानस॥०॥





## रंगु रंगु गुल फवलान

बरजस फुलय वुछिम, सबज़ारन,  
 रंगु रंगु गुल फवलान, गुलज़ारन।  
 न्यँन्दरि वुज्जनाँवुस ज़न, खबरदारन॥  
 रंगु रंगु गुल फवलान, गुलज़ारन॥०॥

सैद्यन सादन, स्योदुय सँदरस तार,  
 चालन मचर, तचर, तौंदरु रेह, नार।  
 मार मटि खारान, कमन कलाकारन॥  
 रंगु रंगु गुल फवलान, गुलज़ारन॥०॥

यमराज़ु लछि—बँद्य रूप दौरिथ,  
 धर्मुराज़ शानन, शहीद सौरिथ।  
 मौरिथ हम, खम, सबक, बाँज़्यगारन॥  
 रंगु रंगु गुल फवलान, गुलज़ारन॥०॥

बरु गँयि तुलसी, मंज मागस,  
 जाफुर चट्ट कति, लूकु बागस।  
 लागस बु मनु—पोश, मंज बहारन॥  
 रंगु रंगु गुल फवलान, गुलज़ारन॥०॥

कोठिश वंदुच तुर ज़ानुन जीवु मीठ,  
 मँस्ती मनसाव, बन मो चु डीठ।  
 ज़रुबाफ नॅर्यवार, टॉट्य रिशतुदारन॥  
 रंगु रंगु गुल फवलान, गुलज़ारन॥०॥

कविता, नॅवीदा, कवि सुंद खून,  
 रातस ज़न कपस, दोनान दून।  
 कूनु कूनु म्वखतु चूने, जरान शारन॥  
 रंगु रंगु गुल फवलान, गुलज़ारन॥०॥

वनि क्या पोशु—शेछ तस तबरदारस,  
 कतरान कौतिल, अथ छु दीवदारस।  
 कलियुगु लतुमोंड छि, पोशि अम्बारन॥  
 रंगु रंगु गुल फवलान, गुलज़ारन॥०॥

पंपोश पुशरिम, मै माजि शारिकाये,  
 ममता मॅशरिथ, वॅजिस दयि—माये।  
 छाये छाये, स्यदान ग्वरु दारन॥  
 रंगु रंगु गुल फवलान, गुलज़ारन॥०॥



राक्षस गरु—वेठ मो, चु सोम्बराव,  
 दीवु सम्पत चु, टकु—टकु गॅन्जराव।  
 अँजराव येती न्याय, नखु दिलदारन॥  
 रंगु रंगु गुल फवलान, गुलजारन॥०॥

‘गिर’ करान शमहस, पोंपरुन्य गथ,  
 जालान नारु पान, छारान वथ।  
 दमु दमु, हरदम, दम छु दमदारन॥  
 रंगु रंगु गुल फवलान, गुलजारन॥०॥



## मन ग्वफि अमृत वुज़ान दारि दारे

मन ग्वफि अमृत वुज़ान, दारि दारे।

पूज़न गणेश, शीवस शिवायि, हारे॥

मनु ग्वफि बर खोल, सूहम सू बोल,

वुफि अचि तोतुजूय, वजि थँदि मनु—डोल।

लोल बर च़ु राजुरेनि, सुहस सवारे॥

मन ग्वफि, अमृत वुज़ान, दारि दारे॥०॥

राम, सीता वनान, क्वहन तु वननुय,

शब्दुक हिसाबा, सातन तु क्षणनुय।

मननुय प्युर दिवान, गोमुत सु तारे॥

मन ग्वफि, अमृत वुज़ान, दारि दारे॥०॥

हरदुक ज़र्द पन, चेनुवन छु सोज़ान,

पनुक प्यनुक, सोज़ा शोरा नु बोज़ान।

रोज़ान च़ु न्यँन्दरे, फसख च़ु अनुवारे॥

मन ग्वफि, अमृत वुज़ान, दारि दारे॥०॥

हँस जुय, जोरि मारान, असमानन,

हंसु रुपु शक्ति, शरण कदरदानन।

खज़ानन म्वल क्याह, दय येलि गारे॥

मन ग्वफि, अमृत वुज़ान, दारि दारे॥०॥



कनन कनुवाना सनन नु बेगाना,  
 जालि कति लोलु पान, छु नु परवाना।  
 मस, मसताना, लबान, लाल लारे॥  
 मन ग्वफि, अमृत वुजान, दारि दारे॥०॥

शंग्रफ नूर, बॅखतिस, ग्वरु कृपाये,  
 शॉन्ती तु सन्तोष धर्मय सभाये।  
 अंभायि पूजा, तगि क्या मै चारे॥  
 मन ग्वफि, अमृत वुजान, दारि दारे॥०॥

वुछुम कायाये, सु हनि हनि सारान,  
 कूरय् म्याँन्य! तनि चानि, दाग दौद्य छारान।  
 मरी कुस, मारि कस, युस मन, मारे॥  
 मन ग्वफि, अमृत वुजान, दारि दारे॥०॥

टुँगुराय वुंगुराय मशुरान, दयुमाय,  
 बन च़ु मुहज्यथ जीवु, काया अख छाय।  
 दाय, दासा बॅनिथ, जन्म रयि, खारे॥  
 मन ग्वफि, अमृत वुजान, दारि दारे॥०॥

दिलु रौस दिलदार, सूरुक सु अंबार,  
 द्वह राथ फू फू, छ्यतु कांगुरि नार।  
 दिलदार सतग्वरु, 'गिर' बु अटुबारे॥  
 मन ग्वफि, अमृत वुजान, दारि दारे॥०॥

## कांह जाय रूजुम नु खॉलीये

बोंबरव बदनस, कॅर्यहम हा ऑली।

कांह जाय रूजुम, नु खॉलीये॥

पुशरान पोशिलँड, ववु कति छम नु जाय,

मोंह ब्योल मनु वारि, ममतायि हुंज छाय।

पाय कोर पानय, टॉट्य ग्वरु पहली॥

कांह जाय रूजुम, नु खॉलीये॥०॥

मनु खाह डोर्यन, थल कॅरुम चूरे,

फसलुक नजारा, छस वुछान दूरे।

हूरे पोशिडॉल, शूब्यस, हा डॉली॥

कांह जाय रूजुम, नु खॉलीये॥०॥

व्यनु, तुलसी, गुलाब, पम्पोश बागस,

शीवु यॉरी, पोश फोल्यमित मे, मागस।

जागस प्रभातस, छम तसुंज चॉली॥

कांह जाय रूजुम, नु खॉलीये॥०॥

संतसंग हूरा, वनवुन, वनवान,

खामोश, बाहोश बोजान कनवान।

धनवान लूबी, क्रूधी तु जॅहली॥

कांह जाय रूजुम, नु खॉलीये॥०॥



कुनुय मॉज, गोमुत गुहिस तुय गासस,  
 गफलत छि दुयतुबाव, गहरतिस तु खासस।  
 सासस मंज वोनून, ब्रौह पख लॉली॥  
 कांह जाय रूजुम, नु खॉलीये॥०॥

शॉही बंगला, मजारा, तु शमशान,  
 म्वंड्यन पान खारान, सपदान हॉरान।  
 शाहमारन ति कृत्य, शहदाद गॉली॥  
 कांह जाय रूजुम, नु खॉलीये॥०॥

गोलि टिपुरायव छि, बॅर्यमित्य आल्यन,  
 तरंगु प्यव माजन, थरु थरु माल्यन।  
 वाह करान बुजदिल, मस छुय मवॉली॥  
 कांह जाय रूजुम, नु खॉलीये॥०॥

दरदिल वुछुम नु कांह, ज़ागान कावुज,  
 ख्यथ च्यथ न्यँदरा छारान वावुज।  
 मचर वौथुम, हचर ह्योतुम बॅरिम तुतुवॉली॥  
 कांह जाय रूजुम, नु खॉलीये॥०॥

अनज़ान 'गिरिजा', लछि मालि गॉमुच,  
 ज्यथ प्रॅसिथ, कुनी तय कीवल पेमुच।  
 द्वह राथ हरु—हरु, बरतल सवाली॥  
 कांह जाय रूजुम, नु खॉलीये॥०॥

## वेथि हुंद आलव बूज मनसाये

वेथि हुँद आलव, बूज मनसाये,  
 स्यद छु डुंगु—श्राना, बालु गंगाये।  
 छोन हलम दारान, द्रामुत भेक्षाये॥  
 वेथि हुंद आलव, बूज मनसाये॥०॥

प्रचंड नूरि नूरा, ज़ंडन ग्वफन गारन,  
 छोर दिस छारुन, अँजुरिय कारन।  
 लारन, लँग्य तु लेच, माजि पूजाये॥  
 वेथि हुंद आलव, बूज मनसाये॥०॥

दमु दमु दम दिनस, राजिरेन्य रॉजी,  
 तेज रफतारा, बाँज्यगर तु बाँजी।  
 गोल कालु सर्पन, वोल् सु मायाये॥  
 वेथि हुंद आलव, बूज मनसाये॥०॥

पृथ्वी पायिदार, ख्वनि मंज क्वह बाल,  
 सोम थव रफतार, करि क्या सुह तु शाल।  
 पावि पावि शुर खसान, थजि कक्षाये॥  
 वेथि हुंद आलव, बूज मनसाये॥०॥



मन म्योन दर्पन, अर्पन छि अँशदार,  
निर्धन केशान, अनि कति स्वनुहार।  
पालान परिवार, सत्-ग्वरु कृपाये॥  
वैथि हुंद आलव, बूज मनसाये॥०॥

नव रात्रन, बँखुत्य कनिकन पूजन,  
श्रूचि श्रानि, ख्यावान बरपूर बूजन।  
जखमन दग चलान, साधु सीवाये॥  
वैथि हुंद आलव, बूज मनसाये॥०॥

वातान व्वखुल्य, कँह हा जाँपानन,  
आनन तु फानन, नाद बेगानन।  
कर्मखुर नेरान, परमुय दयाये॥  
वैथि हुंद आलव, बूज मनसाये॥०॥

‘गिरि’ कामना, स्यद छि, थदि दरबारय,  
बेकल सु भैरव, मरनस नु चारय।  
मिसकीनन तु दीनन चु रक्षाये॥  
वैथि हुंद आलव, बूज मनसाये॥०॥

## माता करनाँविथ दोर दोर

कॅह आयि योर तुय, कॅह रूद्य तोर।  
माता करनाँविथ, चै दोर दोर॥

माता जिंदुय जीव, छिय मूद्यमित्य,  
लिथुवान यम, जिंदु किथु रूद्यमित्य।  
सन्यन जखमन, बरान समयिय क्रोर॥  
माता करनाँविथ, चै दोर दोर॥०॥

गरुबार मोठुमुत, मूद्य अरमान,  
मामस खयनस, ब्रह्मण नु मंदछान।  
दीदन मारु—मार, कनन कटु शोर॥  
माता करनाँविथ, चै दोर दोर॥०॥

गाशदार सपदेय, गाशसुय अँन्य,  
अनिगटि वँन्य दिवान, दयसुय गँन्य।  
अँर्यदँर्य डोलान, लँग्य तरान अपोर॥  
माता करनाँविथ, चै दोर दोर॥०॥



जिछरुच काँछरुच, कांह नो ज्ञान,  
 द्वह राथ वाद—वाद, अगूर अपमान।  
 पादर—सुहस, बनावान छिय ब्रोर॥  
 माता करनाँविथ, चे दोर दोर॥०॥

लरि जायि रोज़न, माता येती,  
 करि कुस क्रियाकर्म, पत्नी पति।  
 शुर्य दूरेन गछुन, मूरन कति खोर॥  
 माता करनाँविथ, चे दोर दोर॥०॥

ब्रगस तोंथ हँज छम, तान कांह नु स्योद,  
 चालि युस ल्यख थ्वख, साध सुय थोद।  
 'गिर' वलान कफना, छय खोरु—शोर॥  
 माता करनाँविथ, चे दोर दोर॥०॥



## मूड जीवस क्याजि शेरान थालस

लछि बँद्य कैम्य क्रील, पूजान लालस,  
कुल्य आलमन कँन्य शेछ, वँन्य कालस।  
मूड जीवस क्याजि, शेरान थालस॥

हारि चरि सँजिथ, दजिथ शीवस सँजदस,  
दंडुवत प्रणामा, मंज ध्यानस छि मस।  
तस दयस, शुकरा, सनान छि नु हालस॥  
मूड जीवस क्याजि, शेरान थालस॥०॥

शराँबिस शराबा, परि कति सु गीता,  
श्रुपनखायि पूजान, सु ज्ञानि कति सीता।  
हीथा हथियार, जवाब नो सवालस॥  
मूड जीवस क्याजि, शेरान थालस॥०॥

लरि जायि थजु, बंजि, भूत प्रीत अँदर,  
न छि कुनि, रेश, मुनी, सँता कलंदर।  
मन्दर, जियारत, वँलिथ, जलुर्य—जालस॥  
मूड जीवस क्याजि, शेरान थालस॥०॥



खोचुन नु गगुरायि, वुजमलि रूदस,  
जीवस जंग करुन, जंगु चुटुन्य क्रूधस।  
सूदस नु बरकथ, हरामा अयालस॥  
मूड जीवस क्याजि, शेरान थालस॥०॥

कुल्यव कट्यव, माजि सूज, शबनम अनजल,  
जीवस यड बॅड, पाजि कति मनु मल।  
खेथ शोंगान, बेयि मंगान, र्वनि गूपालस॥  
मूड जीवस क्याजि, शेरान थालस॥०॥

‘गिरि’ बूज दम द्युतुन, श्रम गोस अँदरी,  
तुलुनार वॉलिंजि, पोश ज़न छि न्यँदरी।  
रथ—वंदान, गथ करान दीन—दयालस॥  
मूड जीवस क्याजि, शेरान थालस॥०॥



## सूहम गंगुराय गन गनेय माँजय

‘सूहम’ गंगुराय, गन गनेय माँजय ।

गुरूमाय साधु त्राय, सन सनेय माजय ॥

अँदुर्य ‘सू’ सेतार, न्यँबुर्य क्रूठ संसार,

अँदुरिम साज बोजि, रोजि युस बेदार ।

‘सु’ तारन छायाि ग्रायि, मारन माजय ॥

‘सूहम’ गंगुराय, गन गनेय माँजय ॥० ॥

फवलि कति ‘सूहम’, मन दुयि ख्योमुत,

फोजमुच फुलया, फल रँय गोमुत ।

पोवमुत सु रूगव तु भूगव माँजय ॥

‘सूहम’ गंगुराय, गन गनेय माँजय ॥० ॥

‘सूहम’ तत्योमुत, मत्योमुत शिकारस,

कोरुम तन मे अर्पन, खोतस नो चिकारस ।

शिकारिस शिकारा फँकीरा छु माँजय ॥

‘सूहम’ गंगुराय, गन गनेय माँजय ॥० ॥



‘सूहम’ सूर्यतीज, सु शीव दीदारा,  
स्वरि युस परि युस, तस डखु—दारा।  
कनन ततुराया, मनन बखुश मॉजय॥  
‘सूहम’ गंगुराय, गन गनेय मॉजय॥०॥

‘सूहम’ पुराण वीद, सतग्वरु मंत्र,  
अलख अगोचर, गरि, करि क्या यंत्र।  
मनवारि अनुबन, यनु—तनु मॉजय॥  
‘सूहम’ गंगुराय, गन गनेय मॉजय॥०॥

‘सू’ प्यालु व्यसुर्योम, लेविथ कतरा चोम,  
श्रेह कोरुम, वेह गोलुम नागुरादा बुज्योम।  
रेह लॅजिम, तेह चॅजिम, फुलय फोजिम मॉजय॥  
‘सूहम’ गंगुराय, गन गनेय मॉजय॥०॥

‘सूहम’ सॅनिथ गोम, पोज अपुजा, नुन्योम,  
शेशतुर बन्योम मोम, पॅदिस त्यंगुला सुन्योम।  
छेनिथ फुटिथ, वॅटिथ वगुव, रॅटिथ ख्वदा मॉजय॥  
‘सूहम’ गंगुराय, गन गनेय मॉजय॥०॥

‘सूहम’ हॅलिस स्योद, मेंदिस तोत यलाजा,  
हेंदिस हुँद बूजन, सेदिस स्यजर ताजा।  
सनि येलि खनि तेलि, हनि हनि मॉजय॥  
‘सूहम’ गंगुराय, गन गनेय मॉजय॥०॥

‘सूहम’ छु गिलुवान, हिलुवान तारन,  
कारण ऊँ ऊँ, हॉरिथ नु हारन।

वैरॉग्य—नारा, तारा छु मॉजय॥

‘सूहम’ गंगुराय, गन गनेय मॉजय॥०॥

अमीरी, गरीबी फलसफु स्यठा ज्यूठ,

फँकीरी फिदा ‘गिर’ मोदुर मेवा म्यूठ।

नंगस न्यँदुर प्रंगस, फंगस फरि कुस मॉजय॥

‘सूहम’ गंगुराय, गन गनेय मॉजय॥०॥





## सोवुम पॉपी पोहल अंहकार

यार्यव तु सर्वव दर्शुन मै होवुम।

सोवुम सु पॉपी, पोहल अंहकार॥

निकि—बडि छि यिकवटु, मंजुला बनावान,

पोरु पोरु दमु दमु, जूला सजावान।

पेश, यारि—फ्युंगरा सु यारु उपहार॥

सोवुम सु पॉपी, पोहल अंहकार॥०॥

मंजुला छु, कॉसिब छानव, गोरमुत,

‘सूहम’ पोरमुत, तु नखशा छु कोरमुत।

तोरमुत छु भवुसरु, सोरमुत सु यार॥

सोवुम सु पॉपी, पोहल अंहकार॥०॥

खनु कथ, अनु कति, जवहर तु लाल,

करु क्या बु, पोश, मूर्ख, कँगाल।

चाल—डाल बोछ सुंज, शाहन छु शहमार॥

सोवुम सु पॉपी, पोहल अंहकार॥०॥

जेवि रोस, ज़बॉन्य रोस, शरण छि दीवस,  
 लोचुरान नखुबोर, पेपन परन शीवस।  
 जीवस जायि गव सु, लोलु ल्वकुचार॥  
 सोवुम सु पॉपी, पोहल अंहकार॥०॥

गरुबार गफलत, म्वकलावुन छि हान,  
 नादान असलस, तति मंगि सूदु सान।  
 दान पुन्य चे दीदन, तल दीदार॥  
 सोवुम सु पॉपी, पोहल अंहकार॥०॥

ममतायि वोल यि जीव, दावि दावे,  
 खँसिथ ह्योर प्यवान ब्वन, पावि पावे।  
 मावे थफ छेनान, अथि नु अख हार॥  
 सोवुम सु पॉपी, पोहल अंहकार॥०॥

बुथिस अथु दिथ, सरु कर, जीवु जॉचुय,  
 केंह चैवान, केंह ख्यवान, केंहन मशान बॉचुय।  
 केंह ज़पान ज़पुमाल, केंह गिंदान ज़ार॥  
 सोवुम सु पॉपी, पोहल अंहकार॥०॥

साधना छि सॉदिल, ग्वरु म्योन दर्दिल,  
 करि क्या दूप दीप, गिरि वुछ सु हरुदिल।  
 ग्वरु दादि दिल रिवान, अँछन अशँदार॥  
 सोवुम सु पॉपी, पोहल अंहकार॥०॥



## सूरदास सनि कति

सूरदास सनि कति, चाँगिस तु गाशस।

गाशदार तोलान, ग्रामस तु माशस॥

मनु गाशे वुछान, गरुडस तु बृषभस,

सवॉर्य गणु—गगरस, वदान मंज मरगस।

पूथ्या पँडितस, जूत्या सु गाशस॥

सूरदास सनि कति, चाँगिस तु गाशस॥०॥

लोरि टिपुराया, सु अँश ददुराया,

खॉरात, खुरियत, मंगान चै ख्वदाया।

ल्यवान प्रेमु टूरिस, ख्यवान लोलु तासस॥

सूरदास सनि कति, चाँगिस तु गाशस॥०॥

ब्यलु पँतरा चोप, अनि अछिदारे,

वौथ तस व्यमाना, पनने वारे।

कथ यिहय सँनिथ गँय, प्यारे—हताशस॥

सूरदास सनि कति, चाँगिस तु गाशस॥०॥

अँन्सि असुन, द्रोग प्योव, द्रोपदी माजे,  
 वनु वनु फेरान, कुनती तु राजे।  
 हलमा दारान, न्यंदायन तु फाशस॥  
 सूरदास सनि कति, चाँगिस तु गाशस॥०॥

मथ गछान बनुहा, अँन्य सुंज लूरा,  
 बारगीर, बु मजबूर, जायि वनु हूरा।  
 खूच्य खूच्य खोलान, बर तस आशस॥  
 सूरदास सनि कति, चाँगिस तु गाशस॥०॥

‘गिरिजा’ ह्यसु रोज़, कर मु अभिमान,  
 अँन्य सुंद अनिगोट, छु अर्जुन बान।  
 मातहत नु कफनस, पाबँद नु वाशस॥  
 सूरदास सनि कति, चाँगिस तु गाशस॥०॥





## हारि चरि शाहदत

लूक नेंद्या ह्यडुन बूजुम कनवुय।  
हारि चरि शाहदत, वोनहम वनवुय॥

सतुक थम साधन, गुशान पान रादन,  
संध्या तय साधना, छि वातान दादन।  
वैटिथ अँछ बोंगरान, खौरव तु टनवुय॥  
हारि चरि शाहदत, वोनहम वनवुय॥०॥

मूडव, चूरव, पोर अफू, द्रायि दूर,  
दमु दमु दूरेय, नीरिथ नोवुय नूर।  
चेनुवन दिनुहख, पहरव तु ख्यनुवुय॥  
हारि चरि शाहदत, वोनहम वनवुय॥०॥

लाशिगरु, लाशि वुछि मे, हरु हरु बोलान,  
जिंदु रिंदु, कीवल, लक्ष्मी छि तोलान।  
अल्लाह—हू—अकबर, बूजुम मे कनवुय॥  
हारि चरि शाहदत, वोनहम वनवुय॥०॥

साध छुय बखशान, पनुन्यन तु परद्यन,  
 कर्मय शाहदत, मॅशरान ख्यन चेन।  
 लागान ज़ोर तु ओन, साध कति सननुय॥  
 हारि चरि शाहदत, वोनहम वनवुय॥०॥

ऊँ—स्वहा कॅरिथ, अन हुमान अँगनस,  
 भाग्यवान जूरूया, छिय बेहान, लँगनस।  
 'गिर' करान सतसंग, सॅनियास बनवुय॥  
 हारि चरि शाहदत, वोनहम वनवुय॥०॥





## पोरु कर्मन छु फल

येतिय आख तोतुय चल, मोतुय मेचि सुत्य रल।

पोरु—कर्मन छु फल, पोरु—कर्मन छु फल॥

जीवु नंगु मो फेर, चंगु ह्यथ मो नेर,

तला कर शम तु दम, दीदारस नु चेर।

गुपिथ रोज़, सोज़ बोज़, बेमार जल चु बल॥

पोरु—कर्मन छु फल, पोरु—कर्मन छु फल॥०॥

चु ममता चटख कति, चु पारुद वटख कति,

फसख ज़ंड़न फटख तति, मेलिय नु कैह अति।

हति हति सोंबरिथ, वति वति अक्युय चै कल॥

पोरु—कर्मन छु फल, पोरु—कर्मन छु फल॥०॥

ग्वरु वनान दासतान, दयि सुंद सु दोसतान,

गरिय ज़्युठ सु भगवान, अनुग्रेह लैज तु दान।

गरु गरु चरचुन, क्वलन अँज़रुन सु ज़ल॥

पोरु—कर्मन छु फल, पोरु—कर्मन छु फल॥०॥

होल होल पॅक्य पॅक्य, पतु पतु शाहमार,  
 दख दिवान, खोंद लगान, अथु ख्वर मिसमार।  
 सैदिस, स्योदय, म्वरली, तु बलरामुन सु हल॥  
 पोरु—कर्मन छु फल, पोरु—कर्मन छु फल॥०॥

सनि युस हा जन्मस, ज़ीवन तु ज़ाँचन,  
 मनि तस छि दयिलय, पय कति बाँचन।  
 राँचन श्वंगि कति, जाग्रन छु पल पल॥  
 पोरु—कर्मन छु फल, पोरु—कर्मन छु फल॥०॥

‘गिरि’ ज़खमन क्रॉर्य, ग्वरु करान मरहम,  
 राज़स यिनु जांह, कुनि फाश करुहम।  
 राश ज़न ज़ेनु, येलि मसला गछि हल॥  
 पोरु—कर्मन छु फल, पोरु—कर्मन छु फल॥०॥





## शीव जी लगयो शंकर नावस

आंपा बाँगरान, जीवस तु कावस,  
 शीव जी लगयो शंकर नावस।  
 गरुबार चोन कति, पय छे नु वावस॥  
 शीव जी लगयो, शंकर नावस॥०॥

स्वामी फेरान, चु बसमा मँलिथुय,  
 शूबिय सँती, कति अँतलास वँलिथुय।  
 गजि दून्या दुजान, लेजि छेनि छावस॥  
 शीव जी लगयो, शंकर नावस॥०॥

छ्यनु हूर गाँमुच बु, मालिन्य बाँचन,  
 मथ गछान रोज़हा, द्वन त्रन राँचन।  
 राज़ बबु सुंज कूर, लँजमुच दावस॥  
 शीव जी लगयो, शंकर नावस॥०॥

कुनी—जँन्य दीवगण, ह्यथ द्रायि सालस,  
 परन प्यथ साँमियस, शरण तस लालस।  
 मारस मच बु पान, यारस बु रावस॥  
 शीव जी लगयो, शंकर नावस॥०॥

बुछुन नु आसन, तस, स्वामी शीवस,  
हुमुन पान अँगनस, लरि अगँनु दीवस।  
ओसुम लोला, कोसुम मै हावस॥  
शीव जी लगयो, शंकर नावस॥०॥

‘गिरिजा’ बु छारान, जखमन मरहम,  
रतुबानि तन मन, जामन जम जम।  
काया कति दरि, आँठम तु मावस॥  
शीव जी लगयो, शंकर नावस॥०॥





## खनि सेतार, खनि दिलदार

खनि सेतार, तु खनि दिलदार।  
 म्वनि मीठ्य कर्यमस, गॅयस गिरिफतार॥

साज—सोज, दीदार, ज्ञानुक कलम,  
 गारि तस, दारि युस, दूरे हलम।  
 अलम शूबि तुलमुलि, माजि म्वखतुहार॥  
 म्वनि मीठ्य कर्यमस, गॅयस गिरिफतार॥०॥

सेपिवारि स्यफ बरान, अथस नरुकोन,  
 श्रूचि पनु रुख दिवान, सत्ग्वरु म्योन।  
 सत्ग्वरु नु व्वडुनोन, गॅडिथ छु दसतार॥  
 म्वनि मीठ्य कर्यमस, गॅयस गिरिफतार॥०॥

मनु मशके मलान, ज़चु तय कज़ुला,  
 तरँगस मायि मोहरु, ज़ोजे छु अंजुला।  
 मंजुला ललवान, बु प्रोन गमखार॥  
 म्वनि मीठ्य कर्यमस, गॅयस गिरिफतार॥०॥

मिजराब, छस दिवान मनु तारे,  
 फेकि बोर, नखुवसि, वारि वारे।  
 चौरिथ, कनइयन पोश, क्रूठ गमखार॥  
 म्वनि मीठ्य कर्यमस, गँयस गिरिफतार॥०॥

हज करनय, कति सपदख चु हॉज,  
 ज़ानुन नु बब मॉज, क्राला तु क्रॉज।  
 चॉज येम्य ल्यख श्वख, तस दीदार॥  
 म्वनि मीठ्य कर्यमस, गँयस गिरिफतार॥०॥

सहायतस रोज़, 'गिरि' हर सातय,  
 लेख, लेखनाव, खोलतम मै खातय।  
 दातय चु पानय, छुख मिलनसार॥  
 म्वनि मीठ्य कर्यमस, गँयस गिरिफतार॥०॥





## शीनुमाने अशिवाने

शीनुमाने, अशिवाने, हनि हनि छि हँमुरान पान।  
त्रेशिहत्यन, गत्यन अशिवोन्य, पालन छि, ब्वछिहँत्य जान॥

तारखमाला छि न्यँदरि सावान, मँशरान शुर्य तय बाँच,  
जूनि शोहजार वुजुनावान, लगान र्यतुबोद तु राँच।  
मोह ममता बाँड लतुमाँड, ख्वश यिवनुय, सु अपमान॥  
शीनुमाने, अशिवाने, हनि हनि छि हँमुरान पान॥०॥

सूर्य मंत्र छु शोहलावान, गँडिथ होल बु नेरन न्यंदन,  
गिलुनावान मे सूर्यदीवता, दुनुना बु प्रान्यन जँदन।  
न्य—जबान्यन, थद्यन—वानयन, चावन छि अमि येमि सान।  
शीनुमाने, अशिवाने, हनि हनि छि हँमुरान पान॥०॥

वँदस स्वंबरान, चंदस नो बरान, न्यराहँरी शोंगान मँज,  
र्यतुकोलिस छि ओश हारान, तोबरुख सु बागँरान मँज।  
दौन्य दौनी बेकस गलान, कर्मस खारि क्या हान॥  
शीनुमाने, अशिवाने, हनि हनि छि हँमुरान पान॥०॥

वज़ान बाजा, ग्रज़ान मुरली, मन छु सन्तूर बोज़ान,  
 स्यदान जोयन, मँदान नालन, नट्यन मटन ज़ल सोज़ान।  
 मूर्ख मस, मय चावान, मानि कृति दयि ऐहसान॥  
 शीनुमाने, अशिवाने, हनि हनि छि हँमुरान पान॥०॥

पलान लछिबँद्य, जीवु जॉचय, ज़ल माजि हुंद उपहार,  
 होख्यन डोर्यन, खाहन बेरन खँरबोद अन छु अंबार।  
 अंहकॉरी, हमन मॉरी, करन कति पाठ, शीवु ध्यान॥  
 शीनुमाने, अशिवाने, हनि हनि छि हँमुरान पान॥०॥

प्यालु अमृत 'गिर' बु चावान, छयँवरान छेयि हुंद नार,  
 फुटुम सेतार, रोव मिज़राब, फीरिथ खोतमुत मै बार।  
 पोरू जन्मुक नखि बोरा, नखु वालुन छु, इम्तिहान॥  
 शीनुमाने, अशिवाने, हनि हनि छि हँमुरान पान॥०॥





## आस्था छम दिलस चॉनिये

जसुदायि माजि याद, बालक अवस्था।  
आस्था छम, दिलस मे चॉनिये॥

पीरन फकीरन, बेबन बरन बु चायस,  
जन्मुक जप तप सपदिथ, बु प्यायस।  
चायस बु वर्गस, दँजुस दौन्य दौनी॥  
आस्था छम, दिलस मे चॉनिये॥०॥

मरुन मँशिथ न्यँदरा, त्राँवम मे मॉजे।  
जोनुम मसॉवी, मसखर सु रॉजे॥  
चेनवन चीर्य दिच मे, कर्मलॉनी।  
आस्था छम, दिलस मे चॉनिये॥०॥

ज्यव फोजिम, न्यँदुर गँजिम, पय लँजिम दासतान,  
गरिय ग्वरुदारा, लरिय मन्दर, आसतान।  
नंदु बब गाशदार, गाटुल तु जॉनी॥  
आस्था छम, दिलस मे चॉनिये॥०॥

वदान वनान, वूर शूर, नजदीकस दूर,  
 वुछिथ, त्रिभवन बु हूर, बेबस मजबूर।  
 अँदुर्य वठ, नभुत्रठ आकाशवाँनी॥  
 आस्था छम, दिलस मै चॉनिये॥०॥

लोरि लायुन मालि, वनुजाह तिनुजाह,  
 पोतर दोद प्यतरुन, शाह बन्योमुत गदाह।  
 रंगु रंगु मंगु मंग, गलती माँनी॥  
 आस्था छम, दिलस मै चॉनिये॥०॥

दजुन—दान व्यतु गोम, ज़ख्मन नून प्योम,  
 मेढ्योमुत टेढ्योम, बँनिथ आम सँनिथ गोम।  
 ताजपूशी कँरिथ, राजि रोस बु राँनी॥  
 आस्था छम, दिलस मै चॉनिये॥०॥

पूरिथ नु पूर्योम, दीदन सु दूर्योम,  
 पोतकल कृष्णुन्य, ख्वर कति मूर्योम।  
 फशिलद वॉलिंज, खश दिलस प्राँनी॥  
 आस्था छम, दिलस मै चॉनिये॥०॥

सँच कर्यम, मँच गँयस, 'गिरजा' बेकुल,  
 ह्यवान साम समयस, निवान च्यथ आँकुल।  
 सोत पख, लोत दि दख, संसार फाँनी॥  
 आस्था छम, दिलस मै चॉनिये॥०॥



## सत्ग्वरु ग्वरदीवु दूता मै सोज

सत्ग्वरु ग्वरदीवु, दूता मै सोज ।  
नतु यितु पानय, तु राथा रोज ॥

पानु युन छु दुर्लब, सोजुव चु दूत,  
चरणन हुंज गर्द, सोजतम सबूत ।  
नालुमति रेंटिथुय, भक्त रटान पोज ॥  
सत्ग्वरु ग्वरदीवु, दूता मै सोज ॥० ॥

गरिकुय लोह लँगर, जूग्युरंग तु बल,  
गरु गरु फेरनुच, मॅशरुन्य चै कल ।  
गरिय छुय, गूकल मुरली चु बोज ॥  
सत्ग्वरु ग्वरदीवु, दूता मै सोज ॥० ॥

मखमल वथरस बु दीवान खानस,  
लिवनफश द्यवु बुति, दिमु हा दानस ।  
तुंबखनॉर, नचिकॉर, व्यखतुय सु सोज ॥  
सत्ग्वरु ग्वरदीवु, दूता मै सोज ॥० ॥

प्यमस परन, परस थदि थदि, श्री राम,  
 मनस शाँती क्षणस, मेलि आराम।  
 कनस, वनस छलि कुस, बरिथ बानु होज॥  
 सत्ग्वरु ग्वरदीवु, दूता मै सोज॥०॥

आत्म गिंदान छुम, छेपि छार्यन,  
 काया बेहान छम, थज्जन दार्यन।  
 जिगर टाँठ छिम वनान, गिरि नाय मोज॥  
 सत्ग्वरु ग्वरदीवु, दूता मै सोज॥०॥

पोज प्रेयम, मेलि कति, मंज दुकानन,  
 जागान 'गिर' हितन छि जागन बहानन।  
 कर सबुर, पपि येलि खामुय मु लोंज॥  
 सत्ग्वरु ग्वरदीवु, दूता मै सोज॥०॥





## वनुन छुनु आमस

पोपराव तु प्वखताव, म्वल छुनु खामस।

जुलुन ज़ीवु त्रामस, वनुन छुनु आमस॥

हरदुच ज़रदी, ज़ॉलिम नु यारे,

यस दयि—यॉरी, तस कुस मारे।

सरयन सबज़ार, फुलय मंज गामस॥

जुलुन ज़ीवु त्रामस, वनुन छुनु आमस॥०॥

लँगिस लेंचिस खवदादोस, अँरिस कति गारे,

बँगिस मनस मँस्ती, अँछन ओश दारे।

पाबंद सु चिलिमे, आशक सु दामस॥

जुलुन ज़ीवु त्रामस, वनुन छुनु आमस॥०॥

सेदिसादु नागरादु, ज्ञानु अमृत वुज़ान,

ध्यान, ज्ञान, साधना, मोह ममता बुज़ान।

परिहेज़ छु क्रूधस, लॉरिथ नु कामस॥

जुलुन ज़ीवु त्रामस, वनुन छुनु आमस॥०॥

बॅखतिस छि बॅखती, शराबिस शराबा,  
 सातकिस हा शाँती, तामसिस कबाबा।  
 रबाबा वजि कति, थफु थुफ जामस॥  
 जुलुन जीवु त्रामस, वनुन छुनु आमस॥०॥

कर्मव अनुसार, दूख स्वख बूगन,  
 कोसान ज़नमन, अँदरीम्यन रूगन।  
 बखशुन नु सीतायि, बलवीर रामस॥  
 जुलुन जीवु त्रामस, वनुन छुनु आमस॥०॥

सरस्वती छि वनवान, 'गिर' साज बोज़ान,  
 कनुडोल कथुनुय, दूरि चूरि रोज़ान।  
 शाँती छि शोहजार, नार क्रूध, तामस॥  
 जुलुन जीवु त्रामस, वनुन छुनु आमस॥०॥





## कुनि किन्य तारतम माता अपोर

मन पाजुनावतम, तन मे पाजुनावतम।  
कुनि किन्य, तारतम माता अपोर॥

मनुच अनुच करतम, माता शोदी,  
ख्यावतम फलहार, मेंड होखी होदी।  
मोसूम ब्वछि—हँच, नंगय बु ननुवोर॥  
कुनि किन्य, तारतम, माता अपोर॥०॥

बोननम, चु लूक न्यायन, मय सन,  
लूक हुंज गँद, 'कूर्य', गरु मय अन।  
गरिचिय गँद वठ, लिवुस होरु योर॥  
कुनि किन्य, तारतम, माता अपोर॥०॥

रट्हा बु सेतार, त्यागुन समावार,  
परिवार जेठि—ज्यूठ, रटनस छुनु वार।  
जोलाना जुलान, सरस्वती छि क्रोर॥  
कुनि किन्य, तारतम, माता अपोर॥०॥

चोन म्योन कॅर्य कॅर्य, गुज़रान द्वह,  
 फेरान बालन, मॅच चटान क्वह।  
 दुयतुबाव जीवस, बनावान सोर॥  
 कुनि किन्य, तारतम, माता अपोर॥०॥

ज़ानु क्या व्रत, उपास, थालन ल्यवान,  
 रंगु दूशु, संगु दूशु, छ्योट मय चवान।  
 अमृत दामस, थावतम मै लोर॥  
 कुनि किन्य, तारतम, माता अपोर॥०॥

बनिहम 'गिरि' छवु, कंडिनुय पोश,  
 गलि येलि आहम, तेलि हमि बोश।  
 पोरस प्यठ दज़ान, कांह शथ पोर॥  
 कुनि किन्य तारतम, माता अपोर॥०॥





## सीवायि यछ पछ सतुकुय पल.

सीवायि यछ पछ, सतुकुय पल।

अँजरान सु मसला, मसलुक हल॥

लक्ष्मण सु त्याँगी, करि कस सु वाद,

जुवु खोतु टाँट्य, सीतायि हुँघ पाद।

राँछदर सु रातस, सातस नु जल॥

सीवायि यछ पछ, सतुकुय पल॥०॥

निष्काम सीवा, कँर हा प्रहलादन,

वुजिना 'सत्ग्वरु' वाँतिथ सु दादन।

दुब्ब—कँनि सनि क्या, तमि खोतु बल॥

सीवायि यछ पछ, सतुकुय पल॥०॥

भक्त स्वनु पाँनिस, दियि क्याजि जोल,

लरिय 'स्यदुमोला', गरिय मीट्य बोल।

अनमोल छि आँही, मँशरान कल॥

सीवायि यछ पछ, सतुकुय पल॥०॥

जानु क्या बु सीवा, अँगहीन अँन्य,  
 कर कृपा, लाग मय, संगदिल सँन्य।  
 वन्यदि वैरागस, खाकस चु रल॥  
 सीवायि यछ पछ, सतुकुय पल॥०॥

जानय नु बंध बांधव रिशतु—दोरी,  
 लार दार छँकरिथ, शुर्य बॉच सॉरी।  
 प्रालबदाना, रैयि कनि तल॥  
 सीवायि यछ पछ, सतुकुय पल॥०॥

सत्ग्वरु हावतम, जिंदय मे स्वर्गदाम,  
 पपि कृति छायि किन्य, रूदमुत खाम।  
 मोह गलि, छाय चलि, पपि अदु फल॥  
 सीवायि यछ पछ, सतुकुय पल॥०॥

ग्वरु ज्ञान, सोनु कान, जीवो खनुस,  
 होशिसान चन्दस चान, बन मो कनुस।  
 दादस सनि सुय, वादस मु डल॥  
 सीवायि यछ पछ, सतुकुय पल॥०॥



राम राम पठ, छुनु दूरि अटु सारुन,  
 भयु दयु खोपुक, पय लयि छारुन।  
 काया रूगी, जूगी रंग मु वल॥  
 सीवायि यछ पछ, सतुकुय पल॥०॥

बनुन पृहलादा, लायुन छु नादा,  
 त्यागुन प्रंग—पलंग, अलग कुन रादा।  
 जीनु वाल गुरिसवार, शीनुमान्य गल॥  
 सीवायि यछ पछ, सतुकुय पल॥०॥

सीवा, गृहस्तधर्म, परिवार पालुन,  
 अंदरी अछ अन्दर, न्यबर्य छार जालुन।  
 बुजदिल चु, गिल त्राविथ, मो चल॥  
 सीवायि यछ पछ, सतुकुय पल॥०॥

पछतावान छस, ह्यस चीर्य आवुम,  
 मॉन्यम स्योदय हार, सीवक बनावुम।  
 'गिरिजायि' छलुनाव, जनदन चुकुट मल॥  
 सीवायि यछ पछ, सतुकुय पल॥०॥



## गूपालु यितु राधा बलय

गूपालु यितु, राधा बलय,  
 अनिगटि नतु, मथुरा चलय।  
 तडपान गौड, छारान जलय॥  
 गूपालु यितु, राधा बलय॥०॥

गूर्यवानन, रिवान मँच बु कोसतूर,  
 डौंठन, म्यवुस फुलये, कौर सूर।  
 नूरि नूरानय, चोलहम, छलय॥  
 गूपालु यितु, राधा बलय॥०॥

माधव चु द्राख, कूठ सोदागार,  
 दय आँसिथ कुनान, बुंगरे, हार।  
 दारि अशिवाने, द्वदु खोर छलय॥  
 गूपालु यितु, राधा बलय॥०॥

नौर दिवान, न्यबर नेरनस मंदछान,  
 कीवल रास गिंदनुच, मालि हान।  
 चाख जामन, तनि, जूग्यु रँग वलय॥  
 गूपालु यितु, राधा बलय॥०॥



असुना गिंदुना कृष्णनय न्युवथम,  
 जन्मुक अथुवास, वेष्णाय चोटुथम।  
 लॉला प्रारान, हलय नो डलय॥  
 गूपालु यितु, राधा बलय॥०॥

गिरधर 'गिर' करि कूनस निवास,  
 छायेन ग्रायेन वुछय, छुम दिलास।  
 क्वंग, चंदुन, कोफूर, अँतरा मलय॥  
 गूपालु यितु, राधा बलय॥०॥



## सत्ग्वरु वनतम गव क्या उपास

सत्ग्वरु वनतम, गव क्या उपवास ।

भवसरु तारुम, काँसि हुंदि पासु ॥

ग्वर वनान व्रत गव, रामु वनवास,

त्योगुन सु पोट पशमीनु, अँतलास ।

माजि ओश वथरान, माँलिस दिलासु ॥

सत्ग्वरु वनतम, गव क्या उपवास ॥० ॥

व्रत गव कैकी वनुन, टाँठ माँज,

चरणन शरण परन, ज़ुजिन मनुच ज़ाँज ।

वोननस चोन म्योन, चीरु अथुवास ॥

सत्ग्वरु वनतम, गव क्या उपवास ॥० ॥

व्रत गव वृद—ज़ीव, ज़ाशुरय ज़ानुन्य,

बब माँज, शीव तय शखती मानुन्य ।

चानुन मँरिस मन, खँरिस बन, दास ॥

सत्ग्वरु वनतम, गव क्या उपवास ॥० ॥

व्रत गव मनु ग्वफि, मन्दरस, अचुन,

‘लल’ चायि, ललि लोग नंगय नचुन ।

वचुन कुनुय सूहम, पचुन यिवान रास ॥

सत्ग्वरु वनतम, गव क्या उपवास ॥० ॥



व्रत गव वुरुन, त्रावुन छु सीरस,  
 राजि दिल बावुन, छु नु पीरस।  
 हीरस म्वल क्या, फंगय नंगय द्रास॥  
 सत्ग्वरु वनतम, गव क्या उपवास॥०॥

व्रत गव नु सनतन, पतु पतु लारुन,  
 दीनस मिसकीनस, तनि छु सारुन।  
 जगतस प्रजाये चु, द्वख दौघ कास॥  
 सत्ग्वरु वनतम, गव क्या उपवास॥०॥

व्रत गव, कौशेल्यायि हुंद, ओश चोन,  
 शब्दुक पय कोडुन, सनि खोतु सोन।  
 गोन सौरुन रामु रामु, अख लछ सास॥  
 सत्ग्वरु वनतम, गव क्या उपवास॥०॥

व्रत हा गव कृष्णु दूरेर चालुन,  
 स्व राधा बैनिथ, आहम छु गालुन।  
 चु पालुन यतीमा, मेलिय उल्लास॥  
 सत्ग्वरु वनतम, गव क्या उपवास॥०॥

‘गिर’ वनान ख्योन च्योन छु नु त्रावुन,  
 पुयिथ पान नारु कौंदि, वारु सावुन।  
 वुछिथ यम खम गोल, नोवुय माजि जास॥  
 सत्ग्वरु वनतम, गव क्या उपवास॥०॥

## साँवनस ज़न जिंदय चेंताये

कृष्ण चूर जसदा, अड़वति त्रॉवथस।

साँवनस ज़न जिंदय, बु चेंताये॥

असुना, गिंदुना, बालु लीला वुछिम,

ऑठम, मावस, पुनिम तय काह मुछिम।

लोरि लायुन कौरिथ, सुहन पथर पाँवनस॥

साँवनस, ज़न जिंदय, बु चेंताये॥०॥

दोति लोंचन लमुन, ब्रमुन लीलायन,

माह—मीठ्य कदमन, लगुन कृष्ण छांयन।

रूपु प्यालु डोलान, कतर्यन चाँवनस॥

साँवनस, ज़न जिंदय, बु चेंताये॥०॥

पोतरु—दोद ललुवुन, प्यतरुन मै माजे,

पोतरु दूर्यर ज़ोरुथ नु दशरथ राजे।

कनन म्वरली शब्द, अब्द डोलनाँवनस॥

साँवनस, ज़न जिंदय, बु चेंताये॥०॥



रातस बैदौरी, दोहस अनिगोट ग्यूर,  
 सातस मशि कति, स्वंदरे, फोलुम सूर।  
 सँच कर्यम मँच गँयस, न्यराहार साँवनस॥  
 साँवनस, ज़न जिंदय, बु चेंताये॥०॥

तपस, ज़पस कोसान, नँसीबस रोशान,  
 कनसस समय वोत, नंदु बब छु तोशान।  
 गोविंद छु गिरधर, 'गिर' प्रसाद ख्याँवनस॥  
 साँवनस, ज़न जिंदय, बु चेंताये॥०॥



## गरु गरु फीरिथ अर आस माँज

गरु गरु फीरिथ, अरु आस माँजय ।  
करु क्या, स्वरु क्या, परु क्या माँजय ॥

जिंदु जुवु पनुन पान, करि कति अन्नदान,  
ख्यावि कस, टोठ तस, ख्वशयिवुन सन्तान ।  
फरि वनान, मोतस तु तोतस माँजय ॥  
गरु गरु फीरिथ, अरु आस माँजय ॥० ॥

व्वथुवुन बेहवुन, प्रथ कथि ह्योड़हम,  
पूजुम मे ठोकुर, पूजायि ओसुहम ।  
रोछुम युस तस निश, रछतम माँजय ॥  
गरु गरु फीरिथ, अरु आस माँजय ॥० ॥

बनुन ओन, ग्रीख चीन, जल पायस प्योन,  
लागुन डलुकाव, बनुन अख मैचि बोन ।  
व्वथुन न्यथ, परन प्यथ, ग्रेजान व्यथ छि माँजय ॥  
गरु गरु फीरिथ, अरु आस माँजय ॥० ॥



अँन्यखलि छँकराव, अँजराव लोत रोज़,  
 कनस कन खबर मु कर, क़ेशुन वदुन बोज़।  
 गोब बोर, खोर च़टि, अनिगटि मॉजय॥  
 गरु गरु फीरिथ, अरु आस मॉजय॥०॥

ख्वनुवठ ख्वड खनुन, बूज़िथ ज़ोर बनून,  
 कुल्यन हुंद पन छनुन, ज़र्द हरदस सनुन।  
 वनुन दय साकार, टाकार मॉजय॥  
 गरु गरु फीरिथ, अरु आस मॉजय॥०॥

होबल्यव, द्वबल्यव ख्यवान, सु मंज द्रागस,  
 लोंचि मंज थवि कति, फाकु फरि मागस।  
 फोरुम वेह, सोरुम नु केंह, मोरुम नु देह मॉजय॥  
 गरु गरु फीरिथ, अरु आस मॉजय॥०॥

वरिहे 'गिरि' काल मेंडिस शंरीख, मरिहे,  
 सु गरुवोल बुंज पँहर, व्वशुला करिहे।  
 गिरधर गोबुर म्योन, खाल कांह छु मॉजय॥  
 गरु गरु फीरिथ, अरु आस मॉजय॥०॥



## शरण परन शीवस

क्वकर्मि, अधर्मी, वँजिस बु वासुनाये ।  
शरण परन बु शीवस, माजि शीवाये ॥

निष्काम कर्मच, कथ गँय नु कनुनुय,  
दशि गँडान अशिमुकाम, असलस नु सननुय ।  
चटान युस वगुवा, फटान मंज खाये ॥  
शरण परन बु शीवस, माजि शीवाये ॥० ॥

त्रावि युस हु—तु—बु, पावि पादर—सुह,  
सन्त बनि पौज वनि, अपजिस लागि खुह ।  
करि सु साधु सीवा, बरि पँज माये ॥  
शरण परन बु शीवस, माजि शीवाये ॥० ॥

वुद्यूगा जुवुच रँछ, वस ह्यस यूगियस,  
आलुछ छु शाहमथ, शाहमार सु भूगीयस ।  
दय नु रँज्य, ख्वश नु काँज्य, बाँज्यगर त्राये ॥  
शरण परन बु शीवस, माजि शीवाये ॥० ॥



साध सन्त, रेष मुनी, वीदन वाशा,  
 मूर्ख अज्ञानी, ज्ञानि क्या सु भाषा।  
 लाशा सु लाशगरु, आशा छि दाये॥  
 शरण परन बु शीवस, माजि शीवाये॥०॥

मरुन मशुन, कनस कशुन, पशुन मॅशरावुन,  
 तरुन छु भवसागरस, लूभ मोह सावुन।  
 म्वछि फोल, गंडस गंडुन, ज़ंडस चूरि छाये॥  
 शरण परन बु शीवस, माजि शीवाये॥०॥

व्याख्या वचुन वोनुम, खोनुम नु जांह पानस,  
 ख्यथ चेथ ब्वछि हॅच, शेरु कस बानस।  
 गगर—छलु, चलु कति, वॅजिस बु ममताये॥  
 शरण परन बु शीवस, माजि शीवाये॥०॥

इयकु—टुह चॅजिम तेलि, येलि वाँस आयम,  
 वोवुम यी लूनुम, सुचन ख्वरस चायम।  
 सुलि—गरि हरि परि, मरि थदि आये॥  
 शरण परन बु शीवस, माजि शीवाये॥०॥

त्वकुचारा फोरुम, पतवलाकन सोरुम,  
 बुडिथ काँयदा पोरुम, सतु र्योत रखुन खोरुम।  
 'गिरि' वति कथि ग्वरु, सत्ग्वरु साये॥  
 शरण परन बु शीवस, माजि शीवाये॥०॥

सरसोती सनमवख, सवालस जवाब

वश करूख, कर्म यँदरे छुय, सवाब।

सरसोती छि सनम्वख, सवालस जवाब॥

गलि किथु आहम, कालुन नु भय,

लैच्यन, हच्यन माह—मीठ्य, शेरुन वय।

स्वनु सुंद चै सेतार, एवपु सुंद रबाब॥

सरसोती छि सनम्वख, सवालस जवाब॥०॥

नरकु केहरि फँटमित्य, खारि कुस शानन,

गंगुवानि मन छलुन, ठसराय नु बानन।

मेचि म्यँच मेलान, गेलान नवाब॥

सरसोती छि सनम्वख, सवालस जवाब॥०॥

रंगु मंदोर्यन, मै लुरुपार, संहार,

खानुबदोशी, गरु चोन, ग्वरु—दार।

छुपिथ ग्वफि आत्म, ज्ञान मो ठबाब॥

सरसोती छि सनम्वख, सवालस जवाब॥०॥



खेम कया दिमु कया मजु जैवि चामुत,  
 खेयि कुस, कड च मुस, जेठि ज्यूठ प्यामुत।  
 अँरिस ख्यन वशनव, खँरिस अख कबाब॥  
 सरसोती छि सनम्वख, सवालस जवाब॥०॥

जवाबा मै म्यूलूम, पानस मै ग्यूलुम,  
 थदि थदि वदुना, वूर शूर बूलुम।  
 'गिरि' मै म्वकलावुम, लग्यम येलि हिसाब॥  
 सरसोती छि सनम्वख, सवालस जवाब॥०॥



## माजि कॅशीरे स्वर्गुचि हूरे

माजि कॅशीरे, स्वर्गुचि हूरे, दूरे वुछमस ओश हारान।  
मन हॅमुराँविथ, तन न्यँमराँविथ, दातस सातस माँज प्रारान॥

स्वखु म्वखु, द्वख आव, दोहली चूर चाव,  
लूँजुख कोचुय च्यपाँर्य, कुल नु कुनि, कुनि नु माव।  
परखान सु मरगन, बॅरगन छि लारान.....

दूरे वुछमस, ओश हारान॥०॥

लूरुपार डुबुडास छु राजि रेश गरुनुय,  
सु, शालु टुंगराया, कुलुफ लॅग्य बरुनुय।  
सूरुबॅन्य, खॅन्य—खॅन्य, पुरन्यन छि छारान॥

दूरे वुछमस, ओश हारान॥०॥

रेश प्रकरथ हा आँस, रेशवारि बाँचन,  
अलज्जन तु पलज्जन, जीवन तु जाँचन।  
द्वखु—स्वख चोक मोदुर, अख अँकिस सारान॥

दूरे वुछमस, ओश हारान॥०॥

गरिच कथ बनेयि आम, लूकव दिचुहम पाम,  
बहारस हरुद आम, प्वखतस बन्योम खाम।  
लॅसिथ—बॅसिथ, वॅसिथ—खॅसिथ वुछिम अथु दारान॥

दूरे वुछमस, ओश हारान॥०॥



छवख लँगिम बदनस, थख छुम नु वदनस,  
लोलुरि हँट्य—गंड, कुल्य फाँस्य मदनस।  
बेबि चूरि, वछि—तल बेवायि मारान॥

दूरे वुछमस, ओश हारान॥०॥

कटसुंद फट्ट—फठ, रंगु चरि चूरि चजि,  
पृछनय गरि द्रायि, ग्वफन गारन लजि।  
कजेन कँल्य बूल्या, लैजन आब कारान॥

दूरे वुछमस, ओश हारान॥०॥

ग्रख बख हारुन्य, छयनु गँयि बारुन्य,  
जुदौयी ख्वदौयी, यमन हैत्य छारुन्य।  
हिकुट चँट, गगुर—फँट, लँट तुलिथ बारान॥

दूरे वुछमस, ओश हारान॥०॥

कलंदर छि कबरन, शदाद शमशानन,  
श्रेष्य कोहिस्तानन, वेष्य गुपन गानन।  
वानन कुलुफ दिथ, दयस राह खारान॥

दूरे वुछमस, ओश हारान॥०॥

सुय फुरान, सुय मरान, सीरस सु साये,  
स्वन गारन, ख्वन बरान, द्वन जुवन पाये।  
जायि गँमुच बु 'गिर' छायि गौर मे तारान॥

दूरे वुछमस, ओश हारान॥०॥

## आराधना आराधना

आँही तु अनुग्रेह अनु धुना, आराधना आराधना।  
पजि—प्रेयमु भक्ति भावु साधना, आराधना आराधना॥

तन मन मे वोलमुत, पापुवुय,  
दँब्यकनि छोलमुत छु, साधुवुय।  
वोनमुत यि काया, छि मेचिबना, आराधना आराधना॥

मागा दोरुम, अपराधा कोरुम,  
अँदुर्य अँदुर्य, चँद्रगोमा सौरुम।  
बलु तेलि, छलु येलि, दलु मना, आराधना आराधना॥

चरचुम मे चूरि, कर्म खातुसुय,  
सोरमुत नु दय, कुनि, सातुसुय।  
बूजिथ वुदुन, द्युतमस कना, आराधना आराधना॥

‘सूहम’, ‘हमसू’, परुन चूरे,  
मूडस नमस्कारा छु, दूरे।  
मूरे नारा, पनुनी ग्वनाह, आराधना आराधना॥



मूल—म्वंजि खारा, मॉज छय ज़िमय,  
 ज़न्मस क्वंजि कजि, बुथि कमि यिमय।  
 मसलन चु, व्वन्य, सनतय हना, आराधना आराधना॥

दीवलूक दीवगण छि, ध्यानसुय,  
 शेरि पोश लागान, पानुसुय।  
 आचमन शोद ज़लु, भूजना, आराधना आराधना॥

सतसंग, साधसंगु, 'गिरि', वस करार,  
 द्यवु लबि पापव निश मोकुजार।  
 सीरा सॅनिथ, सीनस सना, आराधना आराधना॥



## ब्योन ब्योन नखिषा निगौरी

ब्योन ब्योन नखिषा, निगारी मुकानन ।

ब्योन स्वभाव, चालड़ाल पोशेन, इन्सानन ॥

अचान मन मन्दरस, नचान तुलरे गन,  
मनुमल छलु कति, दिमु कुस, पा—सुन ।

वेथ होछ, चेथ निय, नेथ कदरदानन ॥

ब्योन ब्योन नखिषा, निगारी मुकानन ॥० ॥

दीशु वैरागन छु, शीशु कतुरोमुत,

द्वखुलद सीनन सु, चूरु श्रपरोमुत ।

खता क्या, खटिथ खोत्यन, शरण बेगानन ॥

ब्योन ब्योन नखिषा, निगारी मुकानन ॥० ॥

खटिथ वनुनय लाल, यारेन छाये,

वुन्य दिथ नुन्य द्रायि, ग्वरु कृपाये ।

लक्ष्मी ग्रख दिच, खौली खुजानन ॥

ब्योन ब्योन नखिषा, निगारी मुकानन ॥० ॥



करि क्या नारु रेह, शेशतुर शरीरस,  
जम जम जूथ्या, चम चम हरीरस,  
नारु मंज गुलज़ार, फिरान पेयमानन॥  
ब्योन ब्योन नख्खि, निगारी मुकानन॥०॥

लसुना बसुना छु, कर्मव अनुसार,  
डेकद्रख तेजचिख, यलु सुह खुमखार।  
असुना गिंदुना छु, वर मेहरबानन॥  
ब्योन ब्योन नख्खि, निगारी मुकानन॥०॥

जसदा, कौशल्या, द्रनुवय छि गीर,  
चेतस, कृष्ण मुरली, रामुन सु तीर।  
सीर मनुक भावान, कुलेन गूर्यवानन॥  
ब्योन ब्योन नख्खि, निगारी मुकानन॥०॥

महलस सोंबुरान, म्वछि म्वछि म्वछिफोल,  
खौदाया खौरात, 'गिर' छि दारान दोल।  
लौंग लँगान, भेक्षा मँगान, दौनी दुरुदानन॥  
ब्योन ब्योन नख्खि, निगारी मुकानन॥०॥



## मरिथ मरुना

मरिथ मरुना वुछुम, जायि जाये।

जिन्दु मरुना कोर, ललि मीराये॥

पुजवानु तूलिथ, देह दयस सूजुख,

न्यबुरिम बकुवास, अकि कनु बूजुख।

रुजुख समरण, भक्ति भावुनाये॥

जिन्दु मरुना कोर, ललि मीराये॥०॥

दारिबर अडुब्रक्य, छेयि व्वज टपुकान,

रेयि हुंद पकुना, लबि सुत्य चिपुकान।

पकान कारवाना, ग्वरु दयाये॥

जिन्दु मरुना कोर, ललि मीराये॥०॥

वीर छुख, सीर वन, मनुमिसकीनस,

गौरस वनुन, अथुर तोसु पशमीनस।

दीनस सीनस, दोखु बुबुराये॥

जिन्दु मरुना कोर, ललि मीराये॥०॥

वेस वासना, छेम हैसु वेसुरावान,

माया त्रृष्णा छि, बेवायि सावान।

पावान पौहल पथर, मंज सुभाये॥

जिन्दु मरुना कोर, ललि मीराये॥०॥



रोपुदेदि छ्वपि द्वपि, लोब्रमुत छु लाला,  
 बनि सु रामायण, वनि यैलि हाला।  
 माला फिरवान से दिलदुबुराये॥  
 ज़िन्दु मुरुना कोर, ललि मीराये॥०॥

जखुन जीवु खरचमि, हमि पानय हम,  
 गरु सरु करुनस, हाजथ, श्रम दम।  
 खम हुमान, भ्रम चलान जुय गुगुराये॥  
 ज़िन्दु मुरुना कोर, ललि मीराये॥०॥

परखान चु दूपु—दीप, सुचु सेथ म्यानी,  
 अर्ग—चन्दुन पोन्थ पोश, अमानत च्यानी।  
 कान्यी बु करुनस, मासि आशाये॥  
 ज़िन्दु मुरुना कोर, ललि मीराये॥०॥

अडबुज बु बोम्बरा, लजमच वोथुबेठ,  
 देह रेह, क्षेणुनय, वोदुरिस लगान हेठ।  
 सेठ मेठ खोचान, यमु—फिसुराये॥  
 ज़िन्दु मुरुना कोर, ललि मीराये॥०॥

बेस्वर बाजा, बेवक बु वायान,  
 नोर दिथ 'गिरजा', नादा लायान।  
 गासु म्योन, पासु सोन, रासु लीलाये॥  
 ज़िन्दु मुरुना कोर, ललि मीराये॥०॥

## हा ख्वदायो छुय सवाला

हा ख्वदायो छुय सवाला, क्याह मलाला चै गोमुत।  
बंदु बु चॉनी, दादि—चाने मय मै प्याला चोमुत॥

पाक रोज़दर, साफ रोज़न, वँदुहा वॉलिंग जान,  
ख्यनु चनुची मँशरान कल, कीवल कासान हान।  
इफतियारन आबि—जमजम, काबा याद प्योमुत,  
हा ख्वदायो छुय सवाला, क्याह मलाला चै गोमुत॥

फाककँशी, यार दोस छुय, रोज़दर मिसकीनस,  
फाकफरे शुर्य बॉच ह्यथ, सुलाख गॉमित्य सीनस।  
ज़ियाफत दूर, बडुनस सूर, असमानय प्योमुत,  
हा ख्वदायो छुय सवाला, क्याह मलाला चै गोमुत॥

आफताबुच, तापुचँड मु चैन, जूनि हुंद चुश चु शेहजार,  
कर फँकीरी, लथ दि बजरस, बलख दौघलद बेमार।  
कबरिस्तान, शमशान गाठ, कुनुय मार्ग चै होवमुत,  
हा ख्वदायो छुय सवाला, क्याह मलाला चै गोमुत॥

अँछबंद कँरिथ, सरहद तँरिथ क्या चै पज़रा जोनुथ।  
स्योद—सादा शहज़ादा, क्या दुलाला चै मोनुथ।  
गरु तरुहा अरु आमुत, रँदु मशके चै द्योवमुत,  
हा ख्वदायो छुय सवाला, क्याह मलाला चै गोमुत॥



स्वरमु चेशमन रथ वँदुहाय, नीलुध्वथ छुय नु शूबान,  
 शीवु मंदरन, धर्मु दिवयन, गछुहा दिल मे लूबान।  
 क्वहसारव, आबशारव, यलु शहमार त्रोवमुत॥  
 हा ख्वदायो छुय सवाला, क्याह मलाला चै गोमुत॥

पापु कर्मव, वलनय आय, वुडिथगव सु चुक तय माय,  
 बैआर कौतिलन बतुबानन बरमुच लछ, गंद तु हाय।  
 माज़-मेछर, स्यज़र-पज़र, श्वज़र, क्रीट्य समय सोवमुत,  
 हा ख्वदायो छुय सवाला, क्याह मलाला चै गोमुत॥

जंग लोगमुत, जंगथ दोदमुत, बेकस गौमित्य शिकार,  
 गोलु बोरूद, ह्यथ छिय शिकार्य बेगानन छुनु आर।  
 जाशुर्य क्रख, वँह्य तु वाय, तनि तीरा चुबोमुत,  
 हा ख्वदायो छुय सवाला, क्याह मलाला चै गोमुत॥

तकदीरन छँकुराँवी, लँग्य लार दार, वुइयोव ओल,  
 हैंद्य, मुस्लमान, कति ब्योन ब्योन, कुनिय मॉजा कुनुय मोल।  
 गरु-बारन हून्य-वुंगुराय, सूरु डेरा बन्योमुत,  
 हा ख्वदायो छुय सवाला, क्याह मलाला चै गोमुत॥

वन दँद्यमुत्य, व्यथ होछिमुच छ्यनु गँय, व्यसु दोस यार।  
 याद छम नु जाय, कति जायस, शीनु जंग तु कांगरि नार।  
 वैजि-ब्रायुक, बोनि शौहजार, 'गिरि' लरि लरि छेवमुत,  
 हा ख्वदायो छुय सवाला, क्याह मलाला चै गोमुत॥

## सत्ग्वरु पूजा करय

सत्ग्वरु पूजा करय, तनु मनु व्रत बो दरय।  
यिखनय हूरा हरय, सत्ग्वरु पूजा करय॥

वारि वारि सौरी यिवान, सोदामुन कोम—फोल दिवान।  
बैखत्यन करान सरय, सत्ग्वरु पूजा करय॥

पोशान खसान अंबार, शूबिदार शूच ग्वरुदार।  
तोशान ज़रु ज़रय, सत्ग्वरु पूजा करय॥

सितम काँत्याह चाँलिथ, यतीम काँत्याह पाँलिथ।  
रज बनान, वरु वरय, सत्ग्वरु पूजा करय॥

कृष्णुन सु उपदेशा, गालान क्रूध तेशा।  
'श्रीराम' रामाये परय, सत्ग्वरु पूजा करय॥

खूनु चूनु आश्रम लिवान, थ्वंबि थ्वंबि अमृत चवान।  
ग्वरु माँज, स्वनु—ग्वड गरय, सत्ग्वरु पूजा करय॥

'गिर' क्या ज़ानि पूजा, यी पज़ि ती मे सूजा।  
दादि चानि गौमुच बरय, सत्ग्वरु पूजा करय॥



## चिन्तन च़ जीवु कर

मॉजि सँजदा दिवान, कुल्य कँट्य ज़रु ज़रु,  
चिन्ता छि अपराध, चिन्तन च़ जीवु कर।  
मनु रजि गंड मुच़र, संसार कर च़ सरु॥  
चिन्ता छि अपराध, चिन्तन च़ जीवु कर॥०॥

गर्जमंद पीरा, थफ़ दिवान लालन,  
सँथुरस खुर अनान, फिरवान बालन।  
दावि दावि, खुर कडान, दीदन तल सु हर॥  
चिन्ता छि अपराध, चिन्तन च़ जीवु कर॥०॥

मय चोम बेवायि, सपुद्योस बेहोश,  
मयखानन छपान, निर्धन सफ़ेद—पोश।  
छौरुय पयमाना, साकी म्वय च़ बरु॥  
चिन्ता छि अपराध, चिन्तन च़ जीवु कर॥०॥

मनुवॉरा खन, ब्योल बोवि, पानय,  
कमि ज़ाँच़, कमि म्वलु, अनि कमि वानय।  
बर मुच़र कुछन, लेजन, नेरिय हज़ तु शर॥  
चिन्ता छि अपराध, चिन्तन च़ जीवु कर॥०॥

मूर्ख पुजॉर्या, छारान, ठिकाना,  
 गंडन गँडिथ सौदा, फुटमुत दुकाना।  
 खाम सेरि व्यसरान, यलु दारे तु बरु॥  
 चिन्ता छि अपराध, चिन्तन चु जीवु कर॥०॥

गरस लिवान बरस जुलान, कूनन छि लछि डेर,  
 मनु ग्वफि गर्दा, दँह—मन काह सेर।  
 न्यबर नेर, खबर बोज, लोगमुत चे मरु मरु॥  
 चिन्ता छि अपराध, चिन्तन चु जीवु कर॥०॥

ख्योन चोन ह्योन द्योन, कर्मव अनुसार,  
 कैह फटान, कैह खसान, भवसरु गुलजार।  
 यतीमस शफाकत, तति कैह छु नु परु॥  
 चिन्ता छि अपराध, चिन्तन चु जीवु कर॥०॥

‘गिर’ मंगान अथुरोट, चीरु अथुवासा,  
 छेनि कति हॉन्कल, दासन बु दासा।  
 ‘सूहम’ साहितस, सॉथी सु कस बु डरु॥  
 चिन्ता छि अपराध, चिन्तन चु जीवु कर॥०॥





## दूर फलि यितमो

दिलस गोम चूर चूर, दूरफलि यितमो।  
बुछिहथ पूर पूर, दूर फलि यितमो॥

बॅस्ती मसतानु, मॅस्ती मै आमुच,  
याद छम नु हॅसती, कस छस ज़ामुच।  
ज्ञानु—प्रकाश ह्यथ, ग्वरु दीवु यितमो॥  
दूरफलि यितमो, दूरफलि यितमो॥०॥

मनु शीशा फुटान, चूर नूरा वटान,  
जुदौयी ज़ॉलिम, ज़ामु हूरा चटान।  
दौदिस दवा, दरदिल छुख दितमो॥  
दूरफलि यितमो, दूरफलि यितमो॥०॥

ख्यन चेन मोठुमुत, कन थव हालन,  
शीरिथ पुरिथ अन, चु ख्वपु थालन।  
सति—सिनि रोनुमुत, साला चु खेतुमो॥  
दूरफलि यितमो, दूरफलि यितमो॥०॥

अँछ दरु लजिमुच, जसदा माजे,  
 थदि थदि छस वदान, ज़न वज़ान बाजे।  
 द्वह राथ, संध्या प्रभात, द्वनवय मे सितमो॥  
 दूरुफलि यितमो, दूरुफलि यितमो॥०॥

लावि बबरे, द्युत मे द्रोत बागवानन,  
 करु क्या डोर्यन क्या सगुवानन।  
 मेचि बोन अमानथ, वापस चु नितमो॥  
 दूरुफलि यितमो, दूरुफलि यितमो॥०॥

क्रायन बु कारान, ग्रायन प्रारान,  
 छायन वुन्य दिवान, कुन्य कुलेन मारान।  
 साक्षातकार यार, आरयिथ चेतुमो॥  
 दूरुफलि यितमो, दूरुफलि यितमो॥०॥

साहिबो सँच करान, क्याज़ि ज़ायेयस,  
 जसदा रुपस, बु क्याज़ि आयेयस।  
 बारगाहि कूनस, 'गिरजा' बु कितमो॥  
 दूरुफलि यितमो, दूरुफलि यितमो॥०॥





## साई रामु रामु राम परुनावतम

कुनय वाज, कनुय साज, कुनुय राज बावतम,  
साई रामु, रामु रामु, परुनावतम।

ग्वरु ध्यान, हर दम, शामु स्वरुनावतम॥

साई रामु, रामु रामु, परुनावतम॥०॥

सत्ग्वरु, वथ हाव, परमु ग्वरु परदु त्राव,  
दीवु ग्वरु, दिश मे हाव, जगत ग्वरु निश मे साव।

ताव दिथ बोलुनाव, छाव दिथ ख्यावतम॥

साई रामु, रामु रामु, परुनावतम॥०॥

फॅटमुच नाव साई, बोठ चुय खारान,

दिल फुटिनुय, पृछिगरि, रोस तारान।

छारान चे छायि छायि, मतु मंदुछावतम॥

साई रामु, रामु रामु, परुनावतम॥०॥

साई स्योद सादु, छोन छुनु तोलान,

कुनुय रंग, कुनुय संग स्यजरा शोलान।

अडु कॉलसुय शोद मे, बूल्य बोलुनावतम॥

साई रामु, रामु रामु, परुनावतम॥०॥

स्वखदातु मूख्यदातु, साईं छु पानय,  
 सैदिदातु ज्ञानुदातु ज़ालान चु तानय।  
 बानय प्रेयमुक, छानु गरनावतम॥  
 साईं रामु, रामु रामु, परुनावतम॥०॥

जलु सृत्य बाबा, जूत्या ज़ालान,  
 मनुमल कलु छलान, तन नावुनावान।  
 अमर, अमृत, गलि—गलि चावतम॥  
 साईं रामु, रामु रामु, परुनावतम॥०॥

दूरि चूरि रोज़ान, 'गिरि' मंजु चु दीदन,  
 ज़िकिर चोन कौरमुत, पुराणन तु वीदन।  
 चीदन मंजु गँज़र, मै न्याय अँज़रावतम॥  
 साईं रामु, रामु रामु, परुनावतम॥०॥





## शिवु लगयो बु चरणन

शिवु लगयो, बु चरणन।

मूड करु, क्याह वर्णन॥

युस सोरि, बरि बानन,

आबौदी छि, खानन।

चानान, दय छु, वर्णन॥

शिवु लगयो बु चरणन॥०॥

थेज पदवी, गणेशस,

सौरुन, परुन, गृह प्रवेशस।

ज्ञाण बोजान, अर्जन॥

शिवु लगयो बु चरणन॥०॥

प्रजनोव येम्य, बसन्त—काव,

द्वख तसुंद गरु कति चाव।

छालु मारान, सु स्वर्गन॥

शिवु लगयो बु चरणन॥०॥

मशन यस शीवु शीवु नाव,  
 तरि कति नाव, अति वाव।  
 भागीदार, नर्कन॥  
 शिवु लगयो बु चरणन॥०॥

बैखतिस मे शीवु जटु टाँठ,  
 मनस दतुर्य पोशिक्य राँठ।  
 गंगा गिंदान, सर्पन॥  
 शिवु लगयो बु चरणन॥०॥

चर्यन हार्यन हुंद चु ओल,  
 'गिरि' लीख्य, अइकॅल्य बोल।  
 अयाला ह्यथ बु अर्पन॥  
 शिवु लगयो बु चरणन॥०॥





शिबरे पजि प्रेयमु रथि पान खोरुन

शिबरे पजि प्रेयमु, रथि पान खोरुन।  
खबरे दय आस, औतार दोरुन॥

ज्ञानु चूने जर्यन, जूग्य रंगु जामस,  
प्रेयम अमृत छोकुन, मनु किस त्रामस।  
कामस कॅरुन लार, हॉरिथ नु होरुन॥  
शिबरे पजि प्रेयम, रथि पान खोरुन॥०॥

सोदा कुनुन, कुलफा द्युतुन वानस,  
बाँगरोवुन मना, सेर अख नु पानस।  
बानस बरि क्याह, तोत क्युत छोरुन॥  
शिबरे पजि प्रेयम, रथि पान खोरुन॥०॥

कलियुगु गॅहनु, सन, दोदमुत फॅहन ज़न,  
नामुच दॅहन ज़न, क्रूधा सहन ज़न।  
अन ख्यवान मनुवाय, क्रायन सु कारन॥  
शिबरे पजि प्रेयम, रथि पान खोरुन॥०॥

थदि थोद पोशि गोंद, प्रेयमु लोलु प्याला,  
 बॅख्तयन प्रभातस पिलनावान सु काला।  
 नैशब्बद सुदामा, बृषभु लटि तोरुन॥  
 शिबरे पजि प्रेयम, रथि पान खोरुन॥०॥

गहनु त्याग, थव चु राग, साम ह्यतु कजुरस,  
 छोपु—दोप थजुरस, बजरा नु गजुरस।  
 स्यजुरस हजर गोम, 'गिरि' प्योम वोरुन॥  
 शिबरे पजि प्रेयम, रथि पान खोरुन॥०॥





## रामाये नमः

शब्दा छु शूबिदार, दाघन शफा,  
रामाये नमः, श्री रामाये नमः।  
शुर्य—बॉच, गरुबार कीवल भ्रमा॥  
रामाये नमः, श्री रामाये नमः॥०॥

शब्दुक नूरि—नूर, अँनिस पिलुवान लूर,  
बॅखतिस यछ पछ, कासान मुस तूर।  
चूर त्रावान चूर, छारान क्षमा॥  
रामाये नमः, श्री रामाये नमः॥०॥

सत्ग्वरु चावान, केंजि खॉसिस मंज,  
बस कति करु, छस बो मॅस्ती मंज।  
यस करि अथुरोट, तस क्या गमा॥  
रामाये नमः, श्री रामाये नमः॥०॥

मादल तु तुलसी, फवलान, अनुवारे,  
शब्दुच जुचु रुचु प्रथ ब्रसवारे।  
यारस बु प्रारस, बोंबुरस शमा॥  
रामाये नमः, श्री रामाये नमः॥०॥

शब्दुच शफाकथ, जन्मन हुंद तार,  
 येरिलूक परिलूक, ग्वरुदीव, जिमुवार।  
 शुर्य—बॉच ह्यथ, तस चरणन प्यमा॥  
 रामाये नमः, श्री रामाये नमः॥०॥

शब्दय छु त्यागु भावना, प्रजुनावान,  
 क्रीट्य ऑब जीवस छु मॅशरावान।  
 मोह ममता कीवल, अख भ्रमा॥  
 रामाये नमः, श्री रामाये नमः॥०॥

बंद बांधव सपुद मै, रामु परिवार,  
 शब्दुय संसार, शब्दुय मै दरबार।  
 लाचार 'गिरजा', करि क्या जमा॥  
 रामाये नमः, श्री रामाये नमः॥०॥





## बॅखत्यन च़ व्यस्तार मॉजय

साकार रुप़ स्यद, निराकार मॉजय।

जायि जायि, बॅखत्यन च़ व्यस्तार मॉजय॥

यॅन्द्रे, न्यँदरे साव, मनु मंदरस,

तारख छि मंदुछान, वुछिथय चँदरस।

यॅन्द्रस कृष्णन, अहम गोल मॉजय॥

जायि जायि, बॅखत्यन च़ व्यस्तार मॉजय॥०॥

मनुष्य—यूनी, प्रावन्य, ज़ीवु दुर्लब,

पोश, नेशिबोद, कति ज़नि मॉजा बब।

ज़ब, ज़ियाफत कुनुय, आहार मॉजय॥

जायि जायि, बॅखत्यन च़ व्यस्तार मॉजय॥०॥

ज्ञानुक बंडार, ग्वरु तु ग्वरु—आश्रम,

बॅखत्यन आहार वेशनव, शोद तु सम।

गम मशान, चानि थज़ि, बारगायि मॉजय॥

जायि जायि, बॅखत्यन च़ व्यस्तार मॉजय॥०॥

सतसंग, जप तप, राम जूत्य ज़ोतन,  
 सन्योमुत राम नाव, हार्यन तु तोतन।  
 ज़ोतन चै जूग्य रंग, जूग्य तनि मॉजय॥  
 जायि जायि, बॅखत्यन चु व्यस्तार मॉजय॥०॥

बुजर क्रूठ समया, छार खलवख ग्वफ,  
 सततुय ज़ानान बुमसिनि हुंज, ट्वफ।  
 नोर शाँद दिथ, सखरावुम मॉजय॥  
 जायि जायि, बॅखत्यन चु व्यस्तार मॉजय॥०॥

लाचार बेबस, कुस पनुन, वनु कस,  
 शुर बाँच मसतानु, मजबूर 'गिर' छि बस।  
 यस छु हटि वासुक, पासुक सु मॉजय॥  
 जायि जायि, बॅखत्यन चु व्यस्तार मॉजय॥०॥





## मनु म्याने चु अनुदाता

मनु म्याने चु अनुदाता, क्षणु क्षणु स्वरनाव र्वब।  
कुस कंगाला, कुस चंडाला, कांह नु गौर, सौरी बब॥

दयि लयि सनान, स्मरण गनान, दूरान देह, ममता,  
सम न्यँन्दरा, मनु यँन्दरा, यँन्द्र गंगुराय ह्यमथा।  
समता स्यदान, दरदिल वदान, लगान गौरन हुंज सब,  
मनु म्याने चु अनुदाता, क्षणु क्षणु स्वरनाव र्वब॥

बुछिथ शमशान, करान दयि ध्यान, कीवल क्षणु मात्रस,  
कचि रोज़तो, कनव बोज़तो, बूज़िथ गछ़तो मस।  
वस सतसंग, ह्यस छु साधुसंग, रंग बदलान रोज़-ओ-शब,  
मनु म्याने चु अनुदाता, क्षणु क्षणु स्वरनाव र्वब॥

स्वंदर देह, नारुच रेह, अंदर खँटिथ अमानत,  
पुशरुन्य डौल्य, अँगनु राज़स, त्यागु-भावना इबादत।  
च्येथ अमृत न्यथकास भ्रम, कसु चॉन्य पौर कसु डब,  
मनु म्याने चु अनुदाता, क्षणु क्षणु स्वरनाव र्वब॥

बेकारस त्रेकार, जीवस धिकार, कात्याह गुल गॉलिन,  
 विरिमावन छु मूलन द्रोत, जायि पनुने डालिन।  
 मनुगँद छल, जँदुदुन जल, रोवमुत जीवो लब,  
 मनु म्याने चु अनुदाता, क्षण क्षण स्वरनाव र्वब॥

रिंदस रॉव मॉज, जिंदस लॅज जॉज, नख द्युत ज़ाशुर्यव,  
 शापुक व्यलाफ, करि कुस माफ, प्रसनय चामुत्य हुस्यन।  
 मुख्यन चलनदाग, फवलन मनुक्य बाग, आयेगा तू जब,  
 मनु म्याने चु अनुदाता, क्षण क्षण स्वरनाव र्वब॥

मन सोरुय, सीर, सीरत डोंठ वुजमल गगुराय,  
 फरान मनुचूर करान, काम, क्रूध, बाँगरान लोला माय।  
 'गिर' गॅमुच मस, त्याँगिम वस, क्या ज़ियाफत क्या ज़ब,  
 मनु म्याने चु अनुदाता, क्षण क्षण स्वरनाव र्वब॥





## मन्दर मस्जिद यि बुतखाना

मन्दिर मस्जिद, यि बुतखाना।  
अन्दर सुजिथ, कुनुय भगुवाना॥

बाईबल, गीता, कुनुय छु व्याकरण,  
कुनुय जब्बर जेर, मात्रायन सन।  
वचुन, वनुवुन, कुनुय चहचहाना॥  
अन्दर सजिथ, कुनुय भगुवाना॥०॥

वुछुम कावुज कॅरिथ, मलस अथुवासा,  
जन राधा—कृष्ण गिंदान, ब्रजु रासा।  
सीरुकथु, फेकिस अथु, म्यूठ याराना॥  
अन्दर सजिथ, कुनुय भगुवाना॥०॥

नेमाजा पूजा छि, पहरन पाँचन,  
सबक योह्य वनुनुय, गरिक्यन बाँचन।  
जाचन कुनी कब्बर, कुनुय शमशाना॥  
अन्दर सजिथ, कुनुय भगुवाना॥०॥

मलु कलु छलि कति, क्रूठ समसारी,  
पूजा पाठ कति करि बापौरी।

व्यवहारी लबान, खौली खुजाना॥

अन्दर सजिथ, कुनुय भगुवाना॥०॥

आरती इबादत छि, बाँय बारुन्य,  
ललुविथ फलि फलि, पनस तारुन्य।

छारुन्य मस्ती, मस छु मसताना॥

अन्दर सजिथ, कुनुय भगुवाना॥०॥

चिट्ट रँग वलान, खुलान जीवस, जल,  
मुनीवर वनान, प्रौरिव मु, अख पल।

अँतिम समयस, कुनुय छु सामाना॥

अन्दर सजिथ, कुनुय भगुवाना॥०॥

व्रत दुरुन जिन्दु मरुन, शुर्य वदुन बोजुन,  
रोजदर रोजुन, बोज कैंह छु सोजुन।

लौजुन, सोरुन दय, बरुन आसताना॥

अन्दर सजिथ, कुनुय भगुवाना॥०॥



सृत्य न्युव नु कांह फोल, दोल बोर वाँसे,  
 शीनुछटि सोंबुरिथ, मटि ह्युत नु काँसे।  
 त्राव लति वथुरिथ, तति सनुसाना॥  
 अन्दर सजिथ, कुनुय भगुवाना॥०॥

गलिगोद सरुतलि, मुलि कुस कुलाया,  
 फेरि फेरि टपुकान, गजि दुह बलाया।  
 बुजेर अन्येर अनिगोट, गरिय गॉरजाना॥  
 अन्दर सजिथ, कुनुय भगुवाना॥०॥

‘गिर’ छि सायि सीरस, जीठिस दोरस,  
 गुल्य गंड़ान गोरस, सुजदा छु पीरस।  
 लेखिथ गव, होखिथ गव, अख अफसाना॥  
 अन्दर सजिथ, कुनुय भगुवाना॥०॥



